

漢魏六朝百三家集

漢魏六朝百三家集
PDC

徐僕射集題詞

陳世祖時安成王任威福徐孝穆爲
御史中丞彈之下殿高宗議北伐孝
穆舉吳明徹大將裴忌副之克淮南
數十州地周昌強諫張華知人殆有
兼稱非徒以太史之辭干將之筆豪

詡東海也評徐詩者云如魚油龍麝
列堞明霞比擬文字形象亦然廼余
讀其勸進元帝表與代貞陽侯數書
感慨興亡聲淚並發至羈旅篇牘親
朋報章蘇李悲歌猶見遺則代馬越
鳥能不悽然夫三代以前文無聲偶

八音自諧司馬子長所謂鏗鏘鼓舞也浸淫六季制句切響千英萬傑莫能跳脫所可自異者死生氣別耳厯觀駢體前有江任後有徐庾皆以生氣見高遂稱俊物他家學步壽陵菁華先竭猶責細腰以善舞余竊憂其

餓死也玉臺一序與九錫並美天上
石麟青睛慧相亦何所不可哉

婁東張溥題

徐僕射集目錄

賦

鴛鴦賦

詔

陳武帝卽位詔

梁禪陳詔

陳公九錫詔

進武帝爲長城公詔

文帝登祚尊皇太后詔

封始興王詔

策文

梁禪陳策文

陳公九錫策文

璽書

武帝下州郡璽書

梁禪陳璽書

表

勸進梁元帝表

讓五兵尚書表

讓散騎常侍表

讓左僕射初表

讓右僕射初表

爲王儀同致仕表

爲始興王讓瑯琊二郡太守表

移文

爲護軍長史王質移文

移齊文

檄

檄周文

卷二

啓

安成王讓錄尚書表後啓

謝敕賚燭盤賞答齊國移文啓

謝敕賜祀三皇五帝餘饌啓

謝兒報坐事付治中啓

謝賚麈啓

謝東宮賚蛤蚧啓

謝賚蛤啓

書

爲貞陽侯與太尉王僧辯書

爲貞陽侯答王太尉書

爲貞陽侯重與王太尉書

爲貞陽侯答王太尉書

爲貞陽侯重答王太尉書

又爲貞陽侯答王太尉書

名仙集 目錄
三
爲貞陽侯與陳司空書

爲貞陽侯重與裴之橫書

爲貞陽侯與北齊荀昂兄弟書

在北齊與楊僕射書

在北齊與宗室書

在北齊與梁太尉王僧辯書

與王吳郡僧智書

答李顒之書

爲陳武帝作相時與北齊廣陵城主書

爲陳武皇作相時與嶺南酋豪書

爲陳武帝與周宰相書

爲陳主與周冢宰宇文護論邊境事書

爲陳主答周主論和親書

在吏部尚書答諸求官人書

二首

答周處士書

與章司空昭達書

重答朝臣書

薦陸瓊書

報尹義尚書

與李那書

與顧記室書

答族人梁東海太守長孺書

諫仁山深法師罷道書

與智顓書

又

又

五願上智者禪師書

序

玉臺新詠序

碑

司空徐州刺史侯安都德政碑

廣州刺史歐陽顓德政碑

晉陵太守王勣德政碑

丹陽上庸路碑

孝義寺碑

齊國宋司徒寺碑

後集
目錄
五
長干寺衆食碑

東陽雙林寺傅大士碑

天台山徐則法師碑

頌

皇太子臨辟雍頌

有序

銘

太極殿銘

有序

報德寺刹下銘

有序

後堂望美人山銘

麈尾銘

哀策文

陳文帝哀策文

墓誌

司空章昭遠墓誌

河東康簡王墓誌

裴使君墓誌

文

爲武帝卽位告天文

樂府

驄馬驅

中婦織流黃

出自薊北門行

隴頭水

折楊柳

關山月二首

洛陽道二首

長安道

梅花落

紫騮馬

劉生

烏棲曲二首

襍曲

長相思二首

詩

同江詹事登宮城南樓

走筆戲書應令

春情

奉和詠舞

和簡文帝賽漢高帝廟

山齋

詠柑

侍宴

奉和山池

山池應令

別毛永嘉

秋日別庾正員

新亭送別應令

和王舍人送客未還閨中有望

爲羊兗州家人答餉鏡

詠織婦

內園納涼

鬪雞

詠日華

詠雪

春日

奉和簡文帝山齋

附錄

本傳

徐僕射集目錄終

徐僕射集卷一

陳東海徐陵著

明太倉張溥閱

賦

鴛鴦賦

飛飛兮海濱，去去兮迎春。炎皇之季女，織素之佳人。未若宋玉之小史，含情而死。憶少婦之生離，恨新婚之無子。旣交頸於千年，亦相隨於萬里。山雞映水，那自得孤鸞照鏡，不成雙。天下真

成長合會，無勝比翼。兩鴛鴦，觀其哢吭，浮沈輕
軀，灑灑拂荇，戲而波散，排荷翻而水落，特訝鴛
鴦鳥，長情真可念。許處勝人多，何時肯相厭。聞
道鴛鴦一鳥名，教人如有逐春情。不見臨邛卓
家女，祇爲琴中作許聲。

詔

陳武帝卽位詔

五德更運，帝王所以御天。三正相因，夏殷所以宰世。雖色分辭，翰時異文。質揖讓，征伐迄用。參差而有德，振民義歸。一揆朕以寡昧，時屬艱危。國步屢屯，天維三絕。肆勤先后，拯厥橫流。藉將帥之功，兼猛士之力。一匡天下，再造黔黎。梁氏以天祿永終，歷數攸在。遵與能之典，集大命於朕躬。顧惟菲德，辭不獲亮。式從天睠，俯協民心。

受終文祖，升禋上帝，繼迹百王，君臨萬宇，若涉
川水，罔知攸濟，寶業初建，皇祚維新，思俾惠澤，
覃被億兆，可大赦天下，改梁太平二年爲永定
元年，賜民爵二級，文武二等，鰥寡孤獨，不能自
存者，人穀五斛，逋租宿債，皆勿復收，其有犯鄉
里清議，賊汗淫盜者，皆洗除先注，與之更始，長
徒勅繫，特皆原之，亡官失爵，禁錮奪勞，一依舊
典。

梁禪陳詔

五運更始、三正迭代、司牧黎庶、是屬聖賢用能、
經緯乾坤、彌綸區宇、大庇黔首、闡揚鴻烈、革晦
以明、積代同軌、百王踵武、咸由此則、梁德湮微、
禍亂荐發、太清云始、見困長蛇、承聖之季、又罹
封豕、爰至天成、重竊神器、三光亟沈、七廟乏祀、
含生已泯、鼎命斯墜、我武元之祚、有如綴旒、靜
惟屯剝、夕惕載懷、相國陳王有命、自天降神、惟
嶽、天地合德、晷曜齊明、拯社稷之橫流、提億兆
之塗炭、東誅逆叛、北殲獯醜、威加四海、仁漸萬

國復張崩樂重興絕禮儒館聿修戎亭虛候大
功在舜盛績惟禹巍巍蕩蕩無得而稱來獻白
環豈直皇虞之世入貢素雉非止隆周之日固
以效珍川陸表瑞煙雲甘露醴泉旦夕凝涌嘉
禾芝草孳植郊甸道昭於悠代勲格於皇穹明
明上天光華日月革故著於立象代德彰於圖
讖獄訟有歸謳譟爰適天之厯數實有攸在朕
惟庸藐闇於古昔永稽崇替爲日已久敢忘列
代之遺典人祗之至願乎今便遜位別宮敬禪

於陳、一依唐虞宋齊故事。

陳公九錫詔

肇昔元胎剖判，太素氤氳，崇建人皇，必憑洪宰。故賢哲之后，牧伯征於四方，神武之君，大監治乎萬國。又有一匡九合，渠門之賜以隆。戮帶圍溫，行宮之寵斯茂。時危所以貞固，運泰所以光熙。斯乃千載同風，百王不刊之道也。太傅義興公允文允武，乃聖乃神，固天生德，康濟黔首。昔在休期，早隆朝寄，遠踰滄海，大拯交越。皇運不

造書契未聞中國其亡兵凶總至哀哀噍類譬
彼窮牢悠悠上天莫云斯極否終則泰元輔應
期救此將崩援茲已溺乘舟履輦架險浮深經
略中途畢殲羣醜洎乎石頭姑熟流髓履腸一
朝指撝六合清晏是用光昭下武翼亮中都雪
三后之勅讐夷三靈之巨慮堯治禹佐未始能
階殷相周師固非云擬重之以屯剝餘象荆楚
大崩天地無心乘輿委御五湖薦食競謀諸夏
八方暴跣莫有匡救疆臣致命黜我冲人顧影

於荼孺之魂。甘心於甯卿之辱。却按下髻求哀之路。莫從竊鐵逃責。容身之地無所。公神兵奄至。不日清澄。惟是屏蒙。再膺天祿。斯又巍巍蕩蕩。無得而稱焉。加以仗茲忠義。屠彼妖逆。震部夷氛。稽山罷禱。番禺蠡澤。北鄙西郊。殲厥凶徒。罄無遺種。斯則兆民之命。修短所縣。率土之基。興亡是賴。於是刑禮兼訓。訟革有章。中外咸平。遐邇甯一。用能使陽光合魄。曜象呈暉。樓閣遊庭。抱仁舍信。宏勲該於厚地。大道格於玄天。義

農炎昊以來、卷領垂衣之世、聖人濟物、未有如斯者也。夫備物典策、桓文是膺、助理陰陽、蕭曹不讓、未有功高於寓縣、而賞薄於伊周、凡厥人祇、固懷延佇、實由公謙撝自牧、降損爲懷、嘉數遲回、永言增歎、豈可申茲雅尚、久廢朝猷、宜戒司勲、敬升鴻典、且重華大聖、媯汭惟賢、盛德之祀無忘。公侯之門必復。是以殷嘉亶甫、繼后稷之官、堯命羲和、纂重黎之位、况其本枝攸建、宜誓山河者乎。其進公位相國、總百揆、封十郡爲

陳公備九錫之禮，加璽紱，遠遊冠，綠紱，位在諸侯王上，其鎮衛大將軍揚州牧如故。

進武帝爲長城公詔

德懋懋官，功懋懋賞。皇王盛則，所謂元龜。司空公南徐州刺史長城縣開國侯諱志華，夤亮風度，宏遠體文。經武明允，篤誠曩者。率五領之彊兵，誅四海之讐敵。固以勒功彝鼎，書勲太常。克定京師，勤勞自重。自鎮撫，紛榆永甯。豐沛東涼，旣息北蔡。無歸代馬，燕犀氣雄。天下裹糧坐甲。

固敵是求方欲大討於秦嶠敦修於輿睦叶謀
上相爰納朕躬思所以敬答忠勲用申朝典可
進爵爲長城縣公

文帝登祚尊皇太后詔

朕以虛薄才非弘濟竊守藩維常懼盈滿豈圖
蒼昊不弔國步艱難皇嗣元良藐在嶠渭二臣
奉迎川塗靡從六傳還朝淹留永日今國圖無
主家業事隆上奉父母之嚴規下逼羣公之廷
誨遂以庸質升纂帝基對揚大化彌憎號懼今

宜式遵舊則。奉上皇后尊號爲皇太后。御慈訓宮。一依前典。若中流靜晏。皇嗣歸來。輒當解紱於箕山之陽。歸老於瑯琊之國。復子明辟。還承寶圖。若問與夷。無媿園寢。

封始興王詔

漢祖天倫。伯叔追封。晉元世系。瑯琊傳國。仰惟二后重光。率由前典。朕昔因藩次。蒙繼本宗。分在要荒。久離寒燠。天嘉紹祚。別命皇枝。歸自嶠。厠禮隔登獻。每至霜庭。可履。矚垣寢而懷悲。風

樹鳴條。望章陵而增感。今嗣王乖德，獲罪慈訓。永言主奠，宜自朕躬。但國步時艱，皇基務切，復奉家業，升纂帝圖，重建情禮，言淡哽慟，可以第二皇子升陵爲始興王。

策文

梁禪陳策文

咨爾陳王。惟昔上古。厥初生民。驪連栗陸之前。
容成大庭之代。並結繩寫鳥。杳冥恍惚。故靡得
而詳焉。自羲農軒昊之君。陶唐有虞之士。或垂
衣而御四海。或無爲而子萬姓。居之如馭朽索。
去之如脫敝屣。裁遇許由。便能捨帝。暫逢善卷。
卽以讓王。故知立扈璇璣。非關尊貴。金根玉輅。
示表君臨。及南觀河渚。東沈刻璧。精華旣竭。耄

勤已倦。則抗首而笑。唯賢是與。謗然作歌。簡能
斯授。遺風餘烈。昭晰圖書。漢魏因循。是爲故實。
宋齊授受。又宏斯義。我高祖應期。撫運握樞。御
宇。三后重光。祖宗齊聖。及時屬陽九。封豕薦食。
西都失馭。夷狄交侵。乃臬天成。輕弄龜鼎。喋喋
黔首。若崩厥角。微微皇極。將甚綴旒。惟王乃聖。
乃神。欽明文思。二儀竝運。四時合序。天錫智勇。
人挺雄傑。珠庭日角。龍行虎步。爰初投袂。日廼
勤王。電掃番禺。雲撤彭蠡。揃其元惡。定我京畿。

及王賀帝宏貿茲冠履。既行伊霍。用保冲人。震
澤稽陰。並懷叛逆。獯厥醜虜。三亂皇都。裁命偏
師。二邦自殄。薄伐獫狁。六戎盡殪。嶺南叛渙。湘
郢結連。賊帥既擒。兇渠傳首。用能百揆。時序四
門。允穆無思。不服無遠。不屆上達。穹昊下漏。深
泉蛟魚並見。謳歌攸屬。况乎長彗橫天。已徵布
新之兆。璧日斯既。實表更姓之符。是以始創義
師。紫雲曜彩。肇惟尊主。黃龍負舟。楛矢素翬。梯
山以至。白環玉玦。慕德而臻。若夫安國字萌。本

行傳身集 卷一
因萬物之志，時乘御宇，良會樂推之心，七百無常期，皇王非一族，昔木德既季，而傳祚於我有梁，天之歷數，允集明哲，式遵前典，廣詢羣議，王公卿尹，莫不攸屬敬從，人祇之願，授帝位於爾躬，四海困窮，天祿永終，王其允執厥中，軌儀前式，以副溥天之望，禋祀上帝，時膺大禮，永固洪業，豈不盛歟。

陳公九錫策文

大哉乾元，資日月以貞觀，至哉坤元，憑山川以

戴物故惟天爲大，陟配者欽明。惟王建國，翼輔者齊聖。是以文武之佐，磻溪蘊其玉璜；堯舜之臣，澗河鑿其金版。况乎體得一之鴻姿，寧陽九之危厄。拯橫流於碣石，撲燎火於崑岑。驅馭於韋彭，跨蹠於秦晉。神功行而靡用，聖道運而無名者乎。今將授公典策，其敬聽朕命。日者昊天不弔，鍾亂於我國家。網漏吞舟，彊胡內鼎。茫茫宇宙，懔懔黎元。方足圓顛，萬不遺一。太清否亢，橋山之痛已深。太寶屯如，平陽之禍相繼。上宰

膺運康救兆民，鞠旅於滇池之南，揚旌於桂嶺之北，懸三光於已墜，謐四海於羣飛，屠猘獠於中原，斲鯨鯢於濛汜，蕩甯上國，光啓中興，此則公之大造於皇家者也。既而天未悔禍，夷醜荐臻，南夏崩騰，西京蕩覆，羣胡孔熾，藉亂乘間，推納藩枝，盜假神器，冢司昏撓，旁引寇讐，既見貶於桐宮，方謀危於漢閣，皇運已殆，何殊贅旒，中國搖然，非徒如綫，公赫然投袂，匡救本朝，復莒齊都，平戎王室，朕所以還膺寶厯，重履宸居，挹

建武之風猷謨宣王之雅頌此又公之再造於
皇家者也公應務之初登庸惟始三川五嶺莫
不窺臨銀洞珠宮所在甯謐孫盧肇翼越貊爲
災番部貼危勢將淪殄公赤旗所指妖壘洞開
白羽纒擣兇徒紛潰非其神武久喪南藩此又
公之功也大同之末邊政不修李賁狂迷竊我
交愛敢稱大號驕恣甚於尉陀據有連州雄豪
熾於梁碩公英謨雄算電掃風行馳御樓船直
跨滄海新昌典徹備履艱難蘇厯嘉甯盡爲京

觀三山獠洞。八角蠻瓠。逃矣水寓之鄉。悠哉火山之國。馬援之所不屆。陶璜之所未聞。莫不懼我王靈。爭朝邊候。歸琛天府。獻狀鴻臚。此又公之功也。自寇虜陵江。宮闈幽辱。公枕戈嘗膽。提劍撫心。氣涌青霄。神飛紫闥。而番禺連率。本自諸夷。言得其朋。是懷同惡。公仗此忠誠。乘機勦定。執沛令而釁鼓。平新野而據鞍。此又公之功也。世道初艱。方隅多難。勲門桀黠。作亂衡嶷。兵切池隍。衆兼夷獠。公以國盜邊警。知無不爲。卹

是同盟，誅其醜類，莫不魚驚鳥散，面縛頭懸，南
土黔黎，重保蘇息，此又公之功也。長驅嶺嶠，夢
想京畿，緣道酋豪，逝爲榛梗，路養渠率，全據大
都，蓄聚逋逃，方謀阻亂，百樓不戰，雲梯之所未
窺，萬弩齊張，高輶之所非敵，公龍驤虎步，嘯吒
風雲，山靡堅城，野無強陣，清妖氛於瀨石，滅沴
氣於雩都，此又公之功也。遷仕凶慝，屯據大臯，
乞活類，馬騰之軍，流民多杜歿之衆，推鋒轉鬪，
自北徂南，頻歲稽誅，實惟勅虜，公坐揮三略，遙

制六奇、義勇同心、貔貅騁力、雷奔電掣、谷靜山空、列郡無犬吠之驚、叢祠罷狐鳴之盜。此又公之功也。王師討虜、次屆淪波、兵乏兼儲、士有饑色、公回麾蠡澤、積穀巴邱、億庾之詠、斯豐壺漿之迎、是衆軍民轉漕、曾無砥柱之難、艫舳相望、如運敖倉之府、犀渠貝冑、顧茂雷霆、高艦層樓、仰捫霄漢、故使三軍勇銳、百戰無前、承此兵糧、遂殄兇逆、此又公之功也。若夫英圖邁俗、義旅如雲、溢壘猜攜、用掩戎略、公志唯同、獎師克在。

和、鵠、塞、非、虞。鴻門是會。若晉侯之誓白水。如蕭王之推赤心。屈禮交盟。人祇感咽。故能使舟師並路。遠邇同心。此又公之功也。姑熟襟要。峭函阻憑。寇虜據其關梁。大盜負其扁鑄。公一校裁。擣三雄。並奮左賢。右角沙潰。土崩木甲。殪於中原。氊裘赴於江水。他他藉藉。萬計千羣。鄂坂之隘。斯開。夷庚之道。無塞。此又公之功也。義軍大衆。俱集帝京。逆豎兇徒。猶屯皇邑。若夫表裏山河。金湯嶮固。疏龍首以抗殿。榆華嶽以爲城。雜

虜憑焉，疆兵自若。公回茲地軸，抗此天羅。曾不崇朝，俾無遺噍。軍容甚穆，國政方修。物重覩於衣冠，民還瞻於禮樂。楚人滿道，爭覩於葉公。漢老銜悲，俱歡於司隸。此又公之功也。內難初靜，諸侯出關，外郡傳烽。鮮卑犯塞，莫非沮渠當戶。中貴名王，冀馬列於淮南。胡笳動於徐北。公舟師步甲，亘野橫江。殲厥羣毳，遂殫封豨。莫不絀木而止。戎車靡遺。遇濫而旋，歸驂盡殪。此又公之功也。公克黜禍難，劬勞皇室。而孫甯之黨，翻

啓狄心。伊洛之間。咸爲虜戍。雖金陵佳氣。石壘
天嚴。朝聞戎塵。夜喧胡鼓。公三籌旣畫。八陣斯
張。裁舉靈旗。亦抽金僕。咸俘醜類。悉反高墉。異
李廣之皆誅。同龐元之盡赦。此又公之功也。任
約叛渙。梟聲不悛。戎羯貪婪。狼心無改。穹廬羶
幕。抵北闕而爲營。烏孫天馬。指東都而成陣。公
左甄右落。箕張翼舒。掃是攬搶。驅其獫狁。長狄
之種。埋於國門。椎髻之首。烹於軍市。投秦坑而
盡沸。噎澗水而不流。此又公之功也。一相居中。

自折彝鼎。五湖小守。妄懷同惡。公夙駕兼道。秉
羽杖戈。玉斧將揮。金鉦且戒。妖首震懾。遽請灰
釘。蒸櫬以表其含。弘焚書以安其反側。此又公
之功也。賊龕兇橫。陵虐具區。阻兵安忍。憑災怙
亂。自古蟲言鳥跡。渾沌洪荒。凡或虔劉。未此殘
酷。公雖宗居汝潁。世寓東南。育聖誕賢之鄉。含
章挺生之地。眷言桑梓。公私憤切。卓爾英狀。承
規奉算。戮此大憝。如烹小鮮。此又公之功也。亂
離永久。羣盜孔多。浙左兇渠。連兵構逆。豈止千

兵五校白雀黃龍而已哉。公以中軍無率，選是親賢，奸寇途窮，灌然冰泮，刑澹之所，文命動其大威。雷門之間，勾踐行其嚴戮。英規聖迹，異代同風。此又公之功也。同姓有扈，頑兇不賓，憑藉宗盟，圖危社稷。觀兵滙澤，勢震京師。驅率南蠻，已爲東帝。公論兵於廟堂之上，決勝於樽俎之間。寇賈樊滕，浮江下瀨。一朝揄撲，無待旬師。萬里澄清，非勞新息。此又公之功也。豫章妖寇，依憑山澤。繕甲完聚，各厯歲時。結從連橫，爰洎交

廣呂嘉既獲吳濞已縱命我還師。征其不恪。連營盡拔。僞黨斯擒。曜聖武於匡山。回神旌於蠡派。此又公之功也。自八紘九野。瓜剖豆分。竊帝偷王。連州比縣。公武靈已暢。文德又宣。折簡馳書。風猷斯遠。至於蒼蒼浴日。杳杳無雷。北洎丈夫之鄉。南踰女子之國。莫不屈膝膜拜。求吏款關。此又公之功也。京師禍亂。亟積寒暄。雙闕低昂。九門寥豁。甯秦宮之可顧。豈魯殿之猶存。五都簪弁。百僚卿士。胡服縵纓。咸爲戎俗。高冠厚

履希復華風。宋微子麥稷之歌。周大夫黍離之
歎。方之於斯。未足爲悲矣。公求衣昧旦。具食高
春。興構宮闈。具瞻遐邇。郊庠宗稷之典。六符十
等之章。還聞太始之風流。重覩永平之遺事。此
又公之功也。公有濟天下之勲。重之以明德。凝
神體道。合德符天。用百姓以爲心。隨萬機而成
務。恥一物非唐虞之民。歸含靈於仁壽之域。上
德不德。無爲以爲。夏長春生。顯仁藏用。忠信爲
寶。風雨弗憊。仁惠爲基。牛羊勿踐。功成治定。樂

奏咸雲安上治民禮兼文質物色丘園衣裾里
巷朝多君子野無遺賢菽粟同水火之饒工商
富猗頓之旅是以天無蘊寶地有呈祥濶露卿
雲朝團曉映山車澤馬服馭發閑旣景煥於圖
書方葳蕤於史牒高勲踰於象緯積德冠於嵩
華固無得而稱者矣朕又聞之前王宰世茂賞
尊賢式樹蕃長總征羣伯二南崇絕四履遐曠
泱泱表海祚土維齊巖巖泰山俾侯於魯抑又
勤王反鄭夾輔遷周召伯之命斯隆河陽之禮

咸備。况復經營宇宙，甯唯斷鰲足之功，弘濟蒼生，非直鑿龍門之嶮，而疇庸報德，寂爾無聞，朕所以垂拱當空，載懷慙悸者也。今授公相國，以南豫州之陳留，南丹陽，宣城，揚州之吳興，東陽，新安，新甯，南徐州之義興，江州之鄱陽，臨川十郡，封公爲陳公，錫茲青土，苴以白茅，爰定爾邦，用建冢社，昔且奭分陝，俱爲保師，晉鄭諸侯，咸作卿士，兼其內外，禮實攸宜。今命使持節兼太尉王通授相國，印綬陳公，璽綬使持節兼司空。

王瑒授陳公茅土金虎符第一至第五左竹使符第一至第十相國秩踰三鉉任總百司位絕朝班禮由事革其以相國總百揆除錄尚書之號上所假節侍中貂蟬中書監印章中外都督太傅印綬義興公印策其鎮衛大將軍揚州牧如故又加公九錫其敬聽後命以公禮爲楨幹律等銜策四維皆舉八柄有章是用錫公大輅戎輅各一立牡二駟以公賤寶崇穀疏爵待農室富京坻民知榮辱是用錫公袞冕之服赤舄

副焉、以公調理陰陽、燮諧風雅、三靈允降、萬國同和、是用錫公軒縣之樂、六佾之舞、以公宣導王猷、宏闡風教、光景所照、鞶象必通、是用錫公朱戶以居、以公抑揚清濁、褒德進賢、髦士盈朝、幽人虛谷、是用錫命納陛以登、以公嶷然廊廟、爲世鎔範、折衝四表、臨御八荒、是用錫公虎賁之士三百人、以公執茲明罰、期在刑措、象恭無赦、干紀必誅、是用錫公斧鉞各一、以公英猷遠量、躋厲嵩溟、混一車書、括囊寰宇、是用錫公彤

弓一彤矢百旅，弓十旅矢千，以公天經地義，貫
徹幽明，壽露秋霜，允恭棗盛，是用錫公秬鬯一
卣，圭瓚副焉。陳國置丞相以下，一遵舊式，往欽
哉。其恭循朕命，克相皇天，弘建邦家，允興洪業，
以光我高祖之休命。

璽書

陳武帝下州郡璽書

夫四正革代，商周所以應天，五勝相推，軒羲所以當運。梁德不造，喪亂積年，東夏奔騰，西都蕩覆，蕭勃干紀，非唯趙倫。侯景滔天，踰於劉載，貞陽反篡，賊約連兵，江左累屬於鮮卑，金陵久非於梁國。自有氤氳混沌之世，龍圖鳳紀之前，東漢興平之初，西朝永嘉之亂，天下分崩，未有若於梁朝者也。朕以虛薄，屬當興運，自昔登庸，首

清諸越，徐門浪泊，靡不征行。浮海乘山，所在戡定。冒愬風塵，騁馳師旅。六延梁祀，十剪強寇。豈曰人謀，皆由天啓。梁氏以天祿斯改，期運永終。欽若唐虞，推其鼎玉。朕東西退讓，拜手陳辭。避舜子於箕山之陽，求支伯於滄洲之野。而公卿敦逼，率土翹惶。天命難稽，遂享嘉祚。今月乙亥，升禮大壇，言念遷桐。但有懋德，自梁氏將未。頻月亢陽，火運斯終。秋霖奄降，翌日成禮。圓亾宿設，埃雲晚霽。星象夜張，朝景重輪。泣三危之膏。

露晨光合璧，帶五色之卿雲。顧惟寡薄，彌慙休
祉。昧旦丕顯，方思致治。卿等擁旄方岳，相任股
肱。剖符名字，方寄恤隱。王厯惟新，念有欣慶。想
深求民瘼，務在廉平。愛惠以撫孤貧，威刑以禦
彊猾。若有萑蒲之盜，或犯戎商山谷之酋。擅彊
幽險，皆從肆赦。咸使知聞，如或迷途。俾在無貸。
今遣使人具宣往旨，念思善政。副此虛懷。

梁禪陳璽書

君子者自昭明德，達人者先天弗違，故能進退

咸亨、動靜元吉、朕雖蒙寡、庶乎景行、何則三才
剖判、九有區分、情性相乖、亂離云起、是以建彼
司牧、推乎聖賢、授受者任其時來、皇王者本非
一族、人謀是與、屈已從萬物之心、天意斯歸、鞠
躬奉百靈之命、謳謠所往、則攘袂以膺之、菁華
已竭、乃褰裳而去之、昔在唐虞、鑒於天道、舉其
黎獻、授彼明哲、雖復質文殊軌、沿革不同、歷代
因循、斯風靡替、我大梁所以考庸太室、接禮貳
宮、月正元日、受終文祖、但運不常、夷道無恒、泰

山嶽傾偃，河海沸騰，電目雷聲之禽，鉤爪鋸牙之獸，咀齧含生，不知紀極。二后英聖，相仍在天。六夷貪狡，爭侵中國。縣王都帝，人懷干紀。一民尺土，皆非梁地。朕以不造，幼罹閔凶。仰憑衡佐，亟稜年序。周成漢惠，邈矣無階。惟是童蒙必貽顛蹙，若使時無聖哲。世靡艱難，猶當高蹈於滄州。自求於泰伯者矣。惟王應期誕秀，開籙握圖。性道故其難聞，嘉庸已其被物。乾行同其燾覆，日御比其貞明。登承聖於復禹之功，樹鞠子於

與周之業，滅陸渾於伊洛，殲驪戎於鎬京，大小
二震之，驍徒東南兩越之，勅寇遽行天討，無遺
神策，於是祖述堯舜，憲章文武，大樂與天地同
和，大禮與天地同節，鼓之以雷霆，潤之以風雨，
仁霑菽葦，信及豚魚，殷鑪斯空，夏臺虛設，民惟
大畜，野有同人，升平頌平，無偏無黨，固以雲飛
紫蓋，水躍黃龍，東伐西征，晻映川陸，榮光曖曖，
已冒郊廛，甘露瀼瀼，亟流庭苑，車轍馬跡，誰不
率從，蟠米流沙，誰不懷德，祥圖遠至，非唯赤伏

之符靈命昭然何止黃星之氣海口河目賢聖
之表旣彰握旄執鉞君人之狀斯偉且自攝提
無紀孟陬殄滅在矢宵飛天弧曉映久矣夷羊
之在牧時哉蛟龍之出泉葦運之兆咸徵惟新
之符並集朕以欽若勛華屢回星館昔者木運
斯盡予高祖受焉今厯去炎精神歸樞紐敬以
火德傳於爾陳遠鑒前王近謀羣辟明靈有悅
率土同心今遣使持節兼太保侍中尚書左僕
射平樂亭侯王通兼太尉司徒左長史王瑒奉

皇帝璽綬受終之禮一依唐虞故事王其時陟
元后甯育兆民光闡洪猷以承昊天之休命

表

勸進梁元帝表

臣聞封唐有聖、還承帝嚳之家、居代惟賢、終纂高皇之祚、無爲稱於革鳥、至治表於垂衣、而撥亂反正、非間前古、至如金行重作、源出東筦、炎運猶昌、枝分南頓、豈得掩顯姓於軒轅、非才子於顓頊、莫不因時多難、俱繼神宗者也、伏惟陛下出震等於勛華、鳴謙同於且奭、握圖秉鉞、將在御天、玉璠珠衡、先彰元后、神祇所命、非惟太

室之祥圖牒斯歸何止堯門之瑞若夫大孝聖
人之心中庸君子之德固以作訓生民貽風多
士一日二日研覽萬機允文允武包羅羣藝擬
茲三大賓是四門厯試諸難咸熙庶績斯無得
而稱也自无妄爲象鍾禍上京梟獍虔劉宗社
蕩墜銅頭鐵額典暴皇年封豨修蛇行災中國
靈星所宅下武其興望紫極而行號瞻丹陵而
殞慟家冤將報天賜黃鳥之旗國害宜誅神奉
玄狐之箴寇李軼於河津征陶謙於海岱滕公

擁樹雄氣方嚴張繡交兵。風神彌勇。忠誠貫於
日月。孝義感於冰霜。如雷如霆。非貔非虎。前驅
効命。元惡斯殲。旣挂膽於西州。方燃臍於東市。
蚩尤三塚。甯謂嚴誅。王莽千剗。非云明罰。青羗
赤狄。同畀豺狼。胡服夷言。咸爲京觀。邦畿濟濟。
還見隆平。宗祀愔愔。方承多福。自氤氲渾沌之
世。驪連粟陸之君。卦起龍圖。文因鳥跡。雲師火
帝。非無戰陣之風。堯誓湯征。咸用干戈之道。星
躔東井。時破崑潼。雷震南陽。初平尋邑。未有援

三靈之已墜、救四海之羣飛、赫赫明明、躬行天
罰、如當今之盛者也、於是卿雲似蓋、晨映姚鄉、
甘露如珠、朝華景寢、芝房感德、咸出銅池、冀萊
伺晨、無勞銀箭、重以東漸、玄菟、西踰白狼、高柳
生風、扶桑銜日、莫不編名屬國、歸質鴻臚、荒服
來賓、遐邇同慶、其文昭武穆、跗萼也、如彼、天平
地成、功業也、如此、久應旁求、掌故、諮詢天官、斟
酌繁昌、經營高邑、宗王啓霸、非勞武德之侯、清
蹕無虞、何事長安之邸、揚龍旂以饗帝、御鳳展

以承天、歷數在躬、疇與爲讓、去月二十日兼散
騎常侍柳暉等至、鄴伏承聖旨、謙冲爲而不宰、
或云洛陽未復、函谷無泥、旋駕金陵、方膺天睠、
愚謂大庭少昊、非有定居、漢祖殷宗、皆無恆宅、
登封岱嶽、且署明堂、巡狩章陵、時行司隸、何必
西瞻虎踞、乃建王宮、南望牛頭、方稱天闕、抑又
聞之、玄珪旣錫、蒼玉無陳、乃棧樸之愆、期非包
茅之不貢、雲和之瑟久廢、甘泉孤竹之管、無聞
方澤、豈不懼歟、伏願陛下、因百姓之心、拯萬邦

之命。豈可逡巡固讓。方求石戶之農。高謝君臨。
徒引箕山之客。未知上德之不德。惟見聖人之
不仁。率土翹瞻。蒼生何望。昔蘇季張儀。違鄉負
俗。尚復招三方以事趙。請六國以尊秦。况臣等
顯奉皇華。親承朝命。珪璋特達。通聘河陽。貂珥
雍容。尋盟漳水。加牢貶館。隨世汗隆。瞻望鄉關。
誠均休戚。但輕生不造。命與時乖。忝一介之行
人。同三危之遠擯。承間內殿。事絕耿弇之恩。封
奏邊城。私等劉琨之哭。不勝區區之至。謹拜表

以聞

讓五兵尚書表

臣聞仲尼大聖猶云書不盡言士衡高才常稱
文不逮意臣比衰痾自積思緒茫然頻託朋遊
爲裁章表雖復陳琳健筆未盡愚懷孫惠辭人
頗加繁飾所以高天緬邈弗降昭回瞻拜絲綸
更增憂德臣雖不敏弱冠登朝伊昔承華豫游
多士晚逢興運爰濫寵私爾時四郊多壘七雄
分爭國家制度日不暇給趙宮論受命之宜隨

邑奏升壇之禮。而叅聞秘計。弗解單于之兵。飛
箭馳書。未動聊城之將。不期枚乘老叟。忽降時
恩。馮唐暮年。見申明主。擢宰京邑。朝坐棘林。遂
致洛陽無雨。非比長安多盜。其宜屏錮。用寘嚴
科。猶處名僚。久爲叨竊。但著書天祿。雖如劉向。
朔望登朝。轉同王隱。於其朽劣。尚可從容。司會
文昌。邈然非據。

讓散騎常侍表

臣聞五十知命。宗師之格言。六百辭滿。通賢之

高槩昔。墨子諸生。褰裳捋楚。魯連隱士。高論却
秦。况乎謬蒙知己。甯無感激。洪私過誤。寘以通
班。司憲文昌。遂諧常伯。今者昆吾小器。諦視不
見。立黃鈞天。並奏靜聽。能聞鐘鼓。雖神農分藥。
岐伯提針。冥衆因緣。難可匡救。陛下嗣臨寶厯。
光闡大猷。屬意銓衡。留情標棫。燕臺裝玉。儻不
精真。齊客吹竽。諒宜澄簡。南郊奉乘。當求鄭默
之才。西省文辭。應用羅含之學。

讓左僕射初表

臣聞七十之歲。楊雄擬經。六十之年。平津對策。若斯強壯。無歎耆老。臣勸則胄華軒冕。才允卿相。出納流譽。朝野其瞻。臣弘正國老儒宗。情尚虛簡。立風勝業。獨王當年。臣種氣懷沈密。文史優裕。東南貴秀。朝廷親賢。並見壯猷。皆宜左執。若漢武好少。則微臣已老。若周文愛老。則有此羣才。伏願天明。更謀梓匠。求其妙選。稱是能官。

讓右僕射初表

加以言尋盟好。仍屬亂離。先零盜其牛馬。烏孫

竊其印。綬子卿茹雪。叔向爲凶。雖復東歸。備罹此厄。昔李廣遺恨。不值漢初。寧戚自悲。不逢堯禪。臣隨望聖運。實在權輿。時參決勝之籌。頗奏發兵之識。當塗錫命。非無董昭之誠。典午禪文。不降張華之實。

爲王儀同致仕表

尺波歸海。恒歎不居。爝火爲薪。猶悲假續。况復星迴日薄。通人有乞告之言。鐘鳴漏盡。前史有夜行之誠。五陵鼎族。家傳軒冕。四姓卿侯。榮由

恩澤虛名靡實。世官非才。年力方強。不能辭退。
今三元肇慶。六呂司春。得奉萬壽之盃。豫參百
辟之禮。便釋朝衣。謹遵初服。同孔光之杖。載遊
戶庭。廣德之車。方懸私館。

爲始興王讓瑯琊二郡太守表

甫離懷袖。裁脫綺紈。適荷隆私。使膺珪組。執玉
不起。握衣未勝。自甘泉通火。細柳屯兵。旁帶戎
臣。頗同疆場。言瞻漢草。迺曰中州。遙望胡桑。已
成邊郡。誠復居藩體國。應思馬駿之功。論地惟

親宜慕曹彰之勇。

徐僊

身集

卷一

三

移文

爲護軍長史王質移文

比金風已勁，玉露方團，宜及窮秋，幸踰高塞，當使孤旌不反，隻騎無還，非止湯羅，豈知堯德。其承比年民藝，仍歲蘊隆，粒粟貴於隨珠，分糜乏於齊鼎。且氏羗旅拒，已跨伊瀍，胡羯憑陵，方踰汾潞，刺虎之勢，時期卞生，拾蚌之機，彌驗蘇子。但國家體茲明信，有同皎日，豈惟風雨之旦，猶救匹夫。宵夢之言，無欺幽壤，賊華皎近，以臨蒼

有譴作牧無童既懼檻車之徵便憂齊斧之戮
遂乃治兵楚夢竊載干戈傍引西戎共謀東夏
僞周遣其衛國公宇文直等總統獯獫爲其羽
翼醜徒濟岸來攻郢城逆豎浮舟同趣夏浦王
師艤棹素在中流羣帥爭驅應時殲蕩羗胡寶
馬縱橫七澤之中荆楚樓船彌滿三江之上俘
禽所獲水陸無遺華皎擢自芻微叨居藩翰情
慙犬馬罔顧恩靈翻執干戈自圖家國聞諸間
諜具彼鄰謀乃授冬官卽爲鄉導雖傷仁義之

俗非敢有私期和與國之情猶冀無失

移齊文

獲去月二十日移承羯寇平殄同懷慶悅眷言
隣睦深副情伫夫天網之大固無微而不擒神
武之師本無征而不克至如戎王傾其部落逆
豎道其鄉關非厥英圖殆難戡戮况復洞庭遐
曠兵食殷阜西窮版屋北罄氊廬聲冠符姚勢
兼聰勒庸蜀寶馬彌山不窮巴漢樓船凌波無
際我之元戎上將協力同心承稟朝暮致行明

罰爲風爲火、殪彼蒙衝如霆如雷、擊其舟艦、羗
兵楚賊、赴水沉沙、棄甲則兩岸同奔、橫尸則千
里相枕、江川盡滿、譬睢水之無流、原隰窮胡等
陰山之長哭。於是黑山叛邑、諸城洞開、白虜連
羣、投戈請命、長沙鵬鳥、靡復爲妖、湘川石燕、自
然還儻、克翦無算、縲禽不貲、欲計軍俘、終難巧
厯、所獲龍駒驥子、百千其羣、更開苜蓿之園、方
廣駒駝之廐。於是衛霍甘陳、虬髯曠目、心馳隴
路、志飲河源、乘勝長驅、未知所限、豈如桓溫不

武。棄彼關中。殷浩無能。長茲羗賊。方且西踰。酒
郡。抵我境而置邊亭。東略鹽池。爲齊朝而反侵
地。此政亦剪妖氛。未窮巢窟。便聞慶捷。愧佩良
深。

行
具
金
分
一
三

檄

檄周文

主上恭膺寶歷，嗣奉瑤圖。旣稟聖人之材，兼富神武之略。又安兆庶，共靖戎華。用戢干戈，永銷鋒鏑。况復追惟在楚，無忘玉帛之言。軫念過曹，猶感盤餐之惠。年馳玉節之使，歲降銀車之恩。庶使懷音，微悟知感。而反其藏匿，招我叛臣。翊從瀟湘，空竭關壘。荆梁左右，漢沔東西。籲地呼天，望仁哀救。夫一人掩泣，猶愴滿堂。百姓爲心。

彌切宸辰，大都督吳明徹、台司上將德茂勲高，
威著荆湘，化聞庸蜀，叱咤而平宿豫，吹噓而定
壽陽，席卷江淮，無淹弦望。

徐僕射集卷一終

徐僕射集卷二

陳東海徐陵著

明太倉張溥閱

啓

安成王讓錄尚書表後啓

臣聞間平就國。乃盛漢之常儀。廊霍無官。實宗周之明典。何則。皇季之重。非待厯階。王爵之隆。自高羣辟。况臣戢翼。要荒。亟離寒暑。進慙趙勝。能定楚從。退匪齊文。馳免秦厄。固以內切皇心。

外貽家恥。甘輸重餌。降禮單于。列城十五。如請和璧。市鄉三十。聊同寶劍。武夫力而獲。諸原微臣還而反。諸敵瞻言馬駿。著隴右之功。追念曹彰克烏丸之虜。前王子弟。若此勲庸。偏其反而。豈可勝愧。

謝勅賚燭盤賞答齊國移文啓

昔班彪草移。阮瑀裁書。馳譽當年。遂無加賞。非常大賚。始自今恩。雖賈逵之頌神雀。竇攸之對鼯鼠。漢臣射覆之言。魏士投壺之賦。方其寵錫。

獨有光前。官燭斯燃，更慙良吏。宵光可學，乃會
耆年。臣職居南史，身典東觀。謹述私榮，傳之方
策。

謝勅賜祀三皇五帝餘饌啓

竊以甘泉之殿，舊禮義軒。長樂之宮，本圖堯舜。
自東京晚世，曠代無聞。西漢盛儀，復覩今日。金
壺流十旬之氣，玉案備千品之羞。昔絳羅爲薦，
旣延王母。紫蓋爲壇，允招太一同斯。爽號理致，
衆星臣以餘年。豫聞清祀，如陪瑤席。遂飲瓊漿。

謝兒報坐事付治中啓

夫拾金樵路、高士所羞、整冠李下、君子斯慎、兒報不能謹潔、敢觸嚴網、右趾鐵繫、事允法科、左校論輸、實繇恩宥、老臣過庭之訓、多謝古賢折筭之杖、有愧前達。

謝賚麇啓

臣昨旣陪羽獵、仍宴上林、固謝長卿之文、彌慙子雲之賦、預割鮮禽、已同鹽浦、頻蒙大饗、更異梁王、詰旦歸來、猶爲飽飫、虞衡所獻、復降今恩。

賜細君以爲歡、非屠門而大嚼、

謝東宮賚蛤蜊啓

船俗嚴戈、漁人資設、干彼海童、冒茲水豹、望樓闕之氣、得波潮之下、

謝賚蛤啓

鴻化 雀入猶新、纔變秋成、已聞冬獻、

書

爲貞陽侯與太尉王僧辯書

昔自天狼炳曜。非無戰陣之風。參虎揚芒。便有
干戈之務。至於夏鍾夷羿。周厄犬戎。漢委珠囊。
秦亡寶鏡。彰於史籍。可得而聞。未有國家殲危。
遂若當今者也。我大梁膺龍圖而受命。御鳳邸
以承天。軒頊比於諸侯。湯武方於見戲。三光有
又四海無波。靈貺咸臻。表裏禔福。非日非月。蒼
生仰其照臨。如雲如雨。天下蒙其恩蔭。而屯亨

有數剝極爲災。梟獍豺狼肆逞兇逆。後主誕資

上聖。光啓中興。大剪仇讐。方平宗社。雖復瀟湘
舉斧庸蜀。彎弓凡厥兇徒。誰不殲撲。豈圖天未
悔禍。喪亂薦臻。羗虜無厭。乘此多難。虔劉我南
國。蕩覆我西京。奉聞驚號。肝膽崩潰。雖復金行
版蕩。火政淪亡。綠林青犢之群。黑山白馬之卒。
八王故事。曾未混淆。九州春秋。誰云禍亂。昔隆
周徙播。皆憑晉鄭之功。彊漢阡危。終假虛牟之
力。今者武皇之子。無復一人。藐是孤孫。還同三

叛等子。頽而爲暴。同劉芳而入關。乞命諸戎。勢
何支久。孤宗室之長。爰自布衣。皇運之初。彌承
天德。何則。據鞍輟哭。雖紹霸圖。獨居掩涕。終討
家怨。孤二三昆季。方矢戴天。被此恩慈。如何酬
答。所以徐彭之役。不丟輕軀。哀荷之誠。久聞朝
聽。况復邦家不造。至此橫流。宗社無依。何所逃
責。因以提戈負劔。卧泣行號。言念荆巫。志雪讎
耻。大齊觀書有洛。輯端榮河。功格蒼旻。德滿天
地。慈孝之道。通於百靈。仁信之風。覃於萬國。是

以日月所照、舟車所通、候海水以來、賔瞻蒼雲、
以奉貢、昔自軒農炎昊、曾無宣國之規、虞夏商
周、非有伐戎之畧、豈知華夷仰德、遠近同心、穀
價無堯湯之憂、糧儲同水火之賤、精兵利器、勢
勇靄霆、天馬龍媒、量此山谷、斯固開闢以來、未
之有也、至於親鄰之道、夙契逾深、無改曩懷、增
感彌篤、以爲興亡繼絕、事炳前經、推擇庸虛、命
守宗禩、方欲仰憑神武、清我寇讎、肯喻難違、諸
懷更慝、明公誕膺時運、光贊本朝、勒瑞姜瓖、書

名何鼎故以通期管樂、冥契風雲、戮不世之渠
兇、磁滔天之巨寇、重以三湘放命、七國連從、征
旅東西、必翦妖逆、雖復棧道木閣、田單之奉舊
齊、綰璽將兵、周勃之扶隆漢、中宗佐命、俱畫丹
青光、武功臣皆懸星象、非貔非虎之封、同心同
德之勞、校彼功庸、曾何髣髴、但與存與亡期於
體國、喪君有君、甯容無主、夙承所立、猶則孱蒙
天步、方難甯可、弘濟自淹、留大國志、荷恩私朝
夕、宮闈預奉顏色、黃河白日、亟亶誠言、分災卹

患事非虛旨。但善相小國。終資大賢。定我邦家。
繫公是賴。淮流不竭。豈獨瑯琊。望能喻此衷懷。
思之無忽。近陸居士有啟。陳其禍亂。朝旨卽命。
河東王岳等。勒率羆熊。便相抵赴。道阻且長。雖
無之及。所聞西浮。夏首便當。險隘之衝。南捍巴
陵。方拒窺窬之寇。上黨王皇。齊寵弟。是號宗英。
親御戎軒。遠于將送。裴侍中英。起淮南貴族。兼
事戎行。躍冀馬者千羣。披燕犀者萬隊。來自河
陽。曾不旬日。持節徐武。潼三州諸軍。事散騎常

侍明遠將軍東徐州刺史始興郡開國侯湛海
珍等並前朝舊將，夙著勲庸，推轂海邊，屬是喪
亂，雖復投身有道，志雪朝怨，咸預戎行，共指鄉
國。江淮舊隸，悉已招携，方稟英謨，共翦讎難，去
月將晦，便屆壽春，已具舟師，將臨江浦，使人入
境，行陳所懷，撥日覘光，遲在還牘，當使宗祊有
主，余同小白之勲，家國無虞，公保阿衡之貴，何
其美也，豈不休哉，言念此私，但以號咽。

爲貞陽侯答王太尉書

姜常侍嵩至復在去月三十日告具公所懷良以概息孤雖庸薄不及通賢猶曰生民甯無心識自皇家禍亂亟積寒暄九州萬國之人蟠木流沙之地莫不行號臥泣想望休平何況于孤預在宗室家荷報雪之恩身蒙鞠養之愛者先皇之慈也蒸嘗不絕於私廟子弟得嗣於南藩者後主之惠也朱方之地建業之都誰家丘陵誰家官廟豈有爲人臣子荷此恩靈親執干戈自殉家國公之忠孝信感人神公之盟誓事同

懸象。雖復宗盟不造。骨肉爲讎。安可相期。盡如
蕭察耶。古者天子六軍。是爲萬乘。今日凶荒。致
闕斯禮。偏裨將校。尚握精兵。州郡官曹。各有交
吏。未有居稱宸座。行曰乘輿。遂無五尺之童。高
謝千人之長。於公明允。意復云何。國家凋荒。旣
乏屯衛。皇齊與睦。幸惠優矜。何乃自起。趙趙苟
違鄰德。克戡禍亂。欲立功名。咸自軍師。豈在芻
隸。湛海珍等。前朝舊將。差匪齊人。分給羸兵。卽
是梁甲。非云背信。豈曰渝盟。朝野羣雄。何所攜

貳且公天資命世再造皇家梁代之桓文蕭宗
之伊管誰其遠近不稟英謨如有姦回正速齊
祭尚何憂於共工何畏於有苗哉所覽來書既
爲疑難上黨王恭承朝旨不敢相同方篤鄰和
不容全異如須減損更遲行人張廷尉種等所
具此無多及

爲貞陽侯重與王太尉書

席威卿等還在此月十四日告披覽未周良深
愷息昔長平建策猶聞蝕昴之徵疎勒効忠時

致飛泉之感。豈在余涼德。書不盡言。遂使吾賢
猶迷所執。斯故銜哀掩淚。仍復披陳者也。孤以
庸薄。甯有霸圖。侯服于周。常懼盈滿。豈望身居
黃屋。手御青綸。揖讓而對三靈。端委而朝百辟。
詢諸圉牧。莫不皆知。援誓神明。固自無爽。但大
齊仁信之道。關於至誠。睦鄰之懷。由於孝德。遂
蒙殊獎。歸嗣本朝。拜首陳辭。敦誘彌廣。旣而仇
讐未殄。方憑大國之威。宗祏帖危。尤仰親仁之
德。僩俛恩寄。號覲惟深。而勅諭分明。信誓殊重。

乃云邦家有乂社稷無虞凡廣陵歷陽皆許見
還白水黃河屢奉然諾至於夏藩衝要控遏上
流且命強兵爲我臨據若其自有精甲能捍醜
徒並用還梁皆如前旨以孤頻經忝竊屢守淮
淝門生故吏遍於江右凡諸部曲並使招携投
赴戎行前後雲集霜戈雪戟無非武庫之兵龍
甲犀渠皆是雲臺之仗文物以紀之聲名以發
之斯實不世之隆恩甯曰循常之恒禮則公固
天所授弘濟本朝曲阜同功營邱等烈若夫伊

尹庖厨賤宰。霍光階闥小臣。諸葛亮無應變之才。管夷吾非王者之相。論其世業。較彼勤勞。書契已來。罕有明德。且程嬰之義。自古爲難。荀息之忠。良以喜慰。但先朝乘玉鏡之符。御金輪之寶。菩薩之化。行於十方。仁壽之功。沾於萬國。兇人侯景。遂殄邦家。何況於今。亦有吳會江東。如掌差。匪虛言。淮揚在面。方此非局。不稼不穡。多厯歲時。大東小東。全無機杼。關中醜虜。甯非冒頓之鋒。齊國強兵。便是軒轅之陣。西南當扼喉。

之勢東北承撫背之機首尾交侵華夷俱騁而
冲人數歲復子方賒德未感于黎蒸威不加于
將帥斯等怏怏非少主臣安有碌碌因人成事
公之才具雖復明允勢何如于天監時何若于
大同棄與國之隆恩當滔天之猛寇匡救之德
翻未有從忠許之謀誰其相曉臥薪待火方此
弗危繫草從風儔之非切若能思其上策審此
英圖見引軫獵之車還向長安之邸一則二則
惟在大賢外相內相終當相屈正當携諸舊隸

率我賓遊。朝服簪纓。直拜園寢。梁人望國。俱登
赤馬之舟。齊師臨江。仍轉蒼龍之旆。分袂南浦。
揚鞭北風。民不疲勞。軍無怨讟。如其執事。尚秉
前言。將恐戎麾。便濟江表。何則。西浮夏首。已據
咽喉。東進彭波。次指心腹。廣陵京口。烽煙相望。
魯柝聞邾。方之尚遠。胡桑對薊。匹此爲遙。水陸
爭前。龍虎交至。則揚都蕩定。功自齊師。江左臣
民。非關梁國。豈不追慙。後主崇寄之恩。還負齊
朝親鄰之意。東門黃犬。固以長悲。南陽白衣。何

可復得。立茲幼弱。非曰大勲。滅我宗祊。何所逃
釁。今復遣前吉州刺史馬嵩仁至彼。更具往懷
想。不遠而復。無貽祇悔也。若英謨有在。方興祀
夏之功。明監如違。便等過殷之歎。存亡社稷。一
在于公。臨紙崩號。不復多及。

爲貞陽侯答王太尉書

姜暘至枉示具公忠義之懷。家國喪亂。于今積
年。三后蒙塵。四海騰沸。天命元輔。匡救本朝。弘
濟艱難。建武宗祊。至於邱園板築。尚想來儀。公

室皇枝，豈不虛遲。聞孤還國，理會高懷。但近再命行人，或不宣具。公旣詢謀，卿士訪逮。藩維公泝往來，理淹旬月。使乎屆止，殊副所期。便是再立我蕭宗，重興我梁國。億兆黎庶，咸蒙此恩。社稷宗祧，曾不相愧。近軍次東關，頻遣信表之橫處，示其可否。答對驕凶，殊駭聞矚。上黨王陳兵見衛，欲叙安危，無識之徒，忽然逆戰。前旌未舉，卽自披猖。驚悼之情，彌以傷惻。上黨王深自矜嗟，不傳首級，更蒙封樹，飾棺厚殯。務從優禮，齊

朝大德信感神明方仰藉皇威敬憑元宰討逆
賊於咸陽誅叛子於雲夢同心協力克定邦家
覽所示權景宣書上流諸將本有忠畧棄親向
讐庶當不爾防奸定亂終在於公今且頓東關
更待來信未知水陸何處見迎夫建國立君布
在方策入盟出質有自來矣若公之忠節上感
蒼旻羣帥同謀必匪携貳則齊師反旆義不陵
江如致爽言誓以無克韜旗側席遲復行人曹
冲奉表齊都卽押送也渭橋之下惟遲叙言汜

水之陽。預有號懼。

爲貞陽侯重答王太尉書

王尚書通至復枉示知。欲遣賢弟世珍以表誠質。具悉憂國之懷。復以庭中玉樹。掌內明珠。無累冒懷。志在匡救。豈非劬勞我社稷。弘濟我邦家。慙歎之懷。用忘興寢。晉安王東京。貽厥之重。西都繼體之賢。嗣守皇家。甯非民望。但世道喪亂。宜立長君。以其蒙孽。難可成業。成昭之德。自古希儔。冲質之危。何代無此。孤身當否。運志不

圖生忽荷不世之恩，仍致非常之舉，自惟虛薄，
兢懼已深。若建承華本歸皇胄，心口相誓，惟擬
晉安如或虛言，神明所殛，覽今所示，深遂本懷，
敢慰之情，無寄言象，但公憂勞之重，旣稟齊恩，
忠義之情，復及梁貳華夷兆庶，豈不懷風宗廟，
明靈，豈不相感。正爾回旆，仍向歷陽，所期質累，
便望來彼，衆軍不渡，已著盟書，斯則大齊聖主
之恩，規上黨英王之然諾，得原失信，終不爲也。
惟遲相見，使在不賒，鄉國非遙，觸目號咽。

又爲貞陽侯答王太尉書

周尚書弘正張廷尉種姜常侍暲等至枉此月
二十六日告并遣賢弟子世珍賢子顯等具忠
欵之至公養孤之恩愛甚鄧攸少子之懷情深
張禹豈非憂勞社稷用忍肌膚天下含靈誰無
悲愧余遭家不造敬累吾賢言念忠誠益以號
咽但皇齊大德過見憂矜微借輕兵以垂將送
意謂江東凋弊累積寒暄供膳資儲理當多闕
輒白上黨王止請三千人二百疋而已凱衆人

殊尚有疑難將恐諸士未喻雅懷今復命周尚書及姜常侍還彼具陳一二夫以受爲寇非有晉邦不送爲譏終無楚國五千步卒旣謝李陵三千羸兵亦等無忌公之明義理不爲嫌行人失辭尙停然諾臨江總轡企望音郵惟遲來書此不多具

爲貞陽侯與陳司空書

軒轅旣作遇蚩尤之兵顓頊爲君阻共工之亂雖復搖山蕩谷驅電乘雷殘厥兇渠曾靡遺孽

未有時當至治，世在欽明元。惡滔天，遂陷邦家
者也。我大梁開金繩之寶牒，紉玉鏡之珍符。功
烈與造化相伴，德施與風雲俱遠。戴日之族，何
向不賓。太平之基，無遠無屆。逆賊侯景殲亂本
朝，釁重聰彌。凶逾羿浞，後主天經地緯。義冠人
靈，驅馭熊羆。遂剪勅盜，少康祀夏。何可對揚。太
戊興殷，彌無等級。不圖天未悔禍，喪亂薦臻。羗
賊憑陵，侵蕩荆漢。乘輿幽辱，旣陷兇徒。黎獻崩
騰，莫不淪沒。故以哀窮兆庶，痛極蒼旻者也。夫

諸侯釋位。甯非亂禍之朝。宗子維城。本濟殷憂之日。武皇遺胄。皆陷虜庭。乞命偷生。何能支久。孤宗室之長。爰自布衣。辛癸之朝。容身靡託。追惟先業。大庇生民。旣雪伯升之怨。仍紹桓王之霸。孤二三昆季。情禮獲申。等預藩枝。偏承皇德。近歲彭都之役。得備戎昭。鞍甲之勞。庶訓天寵。况復邦家不造。至此橫流。凶狡猶存。何所逃責。固以提戈負劔。卧泣行號。言念荆巫。志雪讐耻。大齊德竝天地。明符日月。隆禮詔俗。張樂被民。

義感華夷、仁侔造化、玉羊銀甕、嘉瑞必彰、澤馬
山車、禎符總集、若夫中原猛士、本自無窮、沙塞
精兵、斯何有量、是以家國之富、文景所未儔、兵
馬之強、秦漢所未敵、但親鄰之道、旣篤、夙私、明
發之懷、彌敦、先好、以爲興亡、繼絕、聖典、通規、爰
命無庸、嗣守社稷、旣方、憑大國、庶討仇讐、恩喻
難違、諸懷慙哽、公體茲懋德、毗奉中興、歸自番
禺、志在討亂、至於雲行、電邁、谷靜、山空、扼鵲尾
而定、王畿、登牛頭、而掃天闕、漸臺、僞帥、將傳首

於帝京郿塢元兇皆橫屍於軍市高庸茂烈振
古希儔承此欣然深所嘉歎今者殷憂未已禍
難相尋宗社無依奧主宣立夙承所眷尙在冲
年王室猶難何以康濟董侯幼弱終覆漢朝馬
業童蒙仍傾晉室所謂前事之不忘後事之龜
兆也孤過荷恩靈預奉帷幄黃河白日亟降誠
言分災卹患事非虛旨但當小國之禮無失敬
恭闔境人民俱勞寤寐方窮人爵之重以報非
常之功惠覽今書希能留意也上黨王文高劉

德武冠曹彰，爰降宗英，遠于將送，裴侍中英起。
贊奉師德，俱事戎間，月壘連營，雲旗蔽野，同集
江淮，翼我歸旆，湛海珍等竝前朝舊將，夙著勲
庸，江左氛妖，投身齊國，今者皆蒙恩獎，竝在戎
行，歸附明公，共前讎難，去月將晦，便留壽春，已
具舟艫，將臨巢浦，若公爲內主，方同國子之勲，
余以定家，得免臧孫之歎，豈不功名富貴，共保
無疆，前望鄉關，惟增號哭。

爲貞陽侯重與裴之橫書

張佛奴昨還得去月二十九日書覽以增慨昔
桓公始反管仲親射其車重耳初還呂卻終焚
其室頃家國多患頻遭閔凶前事不忘便爲龜
兆所以皇齊大德禮秩兼常威武紛紜洪恩汪
濊况復旌旗照日鼓吹從風文物俱華羽衛相
鬱書契以來斯未有也卿天監之始門宦有成
承聖之初身名俱泰正應勤王効命酬二后之
恩憂國如家報三靈之寵何有方規異志苟樹
童蒙阻地險於長川忘天討之應及孤昔忝藩

維○非○無○游○士○平○原○之○館○乃○乏○如○錐○田○文○之○家○差○
有○彈○鋏○雖○李○廣○麾○下○莫○不○封○侯○衛○青○故○人○多○懷○
彼○此○豈○可○文○辭○簡○畧○禮○等○平○交○披○封○伸○紙○益○多○
歎○異○相○鼠○無○儀○表○詩○人○之○作○茅○鴟○刺○傲○彰○魯○史○
之○文○宿○昔○相○期○不○應○如○此○衆○軍○卽○便○頓○江○關○相○
見○在○近○不○復○多○及○

爲貞陽侯與北齊荀昂兄弟書

張佛奴至、未枉還告、但以勞悒、夫興亡繼絕、往
帝之通規、分災恤患、聖王之恒典、自敦龐旣散

詐僞萌生、時託親鄰、信有澆慝、大齊道冠三皇、
風高九代、仁信之本、關於至誠、言與之恩、由於
孝德、孤謬蒙殊獎、還嗣本朝、勅諭分明、言誓殊
重、若使邦家克定、境內無虞、凡廣陵、歷陽、皆許
見還、白水、黃河、屢奉然諾、弊章禮數、莫不優華、
斯乃不世之殊恩、甯是悠常之恆事、王太尉勲
踰呂望、德冠伊衡、凡厥英謀、美靡遺策、豈容當
滔天之巨寇、遠大國之隆恩、計彼賢明、必當不
爾、卿維兄及弟、莫非雄才、江外風塵、不染兇寇

賈氏三虎。豈獨貴於前修。荀家八龍。信服在於今日。近者州司不道。或致流言。朝聽矜明。已如前及想謀。元宰善保良圖。南道主人以相付也。見所答東海徐湛書。粗具來意。昔桓憑莒衆。文用秦攻。是假鄰國之威。以備非常之變。若使江東宰匠。具領齊恩。時命封疆。遠相迎接。故當携諸舊隸。率我賓游。朝服簪纓。直拜園寢。梁人望國。自合水而浮舟。齊師言歸。指滄江而迴旆。如其彼相。未悟良機。將恐戎麾。遂踐京邑。若其求

成取敗豈謂和風龍馬雲旗差不相涉一二復
令張佛奴口具相見在近此不多及

在北齊與楊僕射書

陵叩頭叩頭夫一言所感凝暉照于魯陽一志
冥通飛泉涌于疏勒况復元首康哉股肱良哉
隣國相聞風教相期者也天道窮剝鍾亂本朝
情計馳惶公私哽懼而骸骨之請徒淹歲寒顛
沛之祈空盈卷軸是所不圖也非所仰望也執
事不聞之乎昔分鼇命鳳之世觀河拜洛之年

則有日烏流災風禽騁暴天傾西北地缺東南
盛旱坼三川長波含五嶽我大梁應金圖而有
亢纂玉鏡而猶屯何則聖人不能爲時斯固窮
通之恒理也至如荊州刺史湘東王機神之本
無寄名言陶鑄之餘猶爲堯舜雖復六代之舞
陳于總章九州之歌登于司樂虞夔拊石晉曠
調鐘未足頌此英聲無以宣其盛德者也若使
郊禋楚翼甯非祀夏之君戡定艱難便是匡周
之霸豈徒幽王徙雍朞月爲都姚帝遷河周年

成邑。方今越裳藐藐，馴雉北飛，肅脊茫茫，風牛
南偃。吾君之子，含識知歸，而答旨云：何所不投
身斯其未喻一也。又晉熙等郡皆入貴朝，去我
潯陽，經塗何幾，至於鎗鎗曉漏的的，宵烽隔淑
浦而相聞，臨高臺而可望，泉流寶盃，遙憶湓城。
峰號香鑪，依然廬嶽。日者鄱陽嗣王，治兵匯派，
屯戍淪波，朝夕賤書春秋，方物吾無從以躡屨，
彼何路而齊鑣，豈其然乎斯不然矣。又近者邵
陵王通，此國郢中，上客雲聚，魏都鄴下，名卿

風馳江浦。豈盧龍之徑。于彼新開。銅駝之街。于我長閉。何彼途甚易。非勞于五丁。我路爲難。如登于九折。地不私載。何其爽歟。而答旨云。還路無從。斯所未喻。二也。晉熙廬江。義陽安陸。皆云欵附。非復危邦。計彼中途。便當靜晏。自斯以北。桴鼓不鳴。自此以南。封疆未壹。如其境外。脫殞輕軀。幸非邊吏之羞。何在匹夫之命。又此段賓遊。通無貨殖。豈非韓起聘鄭。私買玉環。吳札過徐。躬夏寶劍。由來宴錫。凡厥囊裝。行役淹留。皆

已虛罄散有限之微財，供無期之久客，斯可知矣。且據圖刎首，愚者不爲，運斧全身，庸流所鑒。何則？生輕一髮，自重千鈞，不以賈盜明矣。骨肉不任克鼎俎，皮毛不足入貨財，盜有道焉。吾無憂矣。又公家遣使，脫有資須，本朝非隆平之時，遊客豈皇華之勢，輕裝獨宿，非勞聚橐之儀，微騎閒行，甯望輪軒之禮，歸人將從私具，驢騾緣道亭郵，唯希蔬粟。若曰畱之無煩於執事，遣之有費於官司，或以顛沛爲言，或云資裝可懼，固

非通論，皆是外篇，斯所未喻三也。又若以吾徒
應還侯景，侯景兇逆，殲我國家，天下含靈，人懷
憤厲，既不獲投身社稷，衛難乘輿，四冢磔蚩尤
千刀，剗王莽，安所謂俛首頓膝，歸奉寇讐，佩弭
腰鞬，爲其皂隸。日者通和，方敦曩睦，凶人狙詐，
遂駭狼心，頗疑宋萬之誅，彌懼荀營之請，所以
奔蹄勁角，專恣憑陵，凡我行人，偏膺讎憾，政復
菹筋醢骨，抽舌探肝，於彼凶情，猶當未雪，海內
之所知也。君侯之所具焉，又聞本朝王公都人

士女風行雨散東播西流京邑邱墟葦蓬蕭瑟
偃師還望咸爲草萊霸陵回首俱沾霜露此又
君之所知也彼以何義爭免寇讎我以何親爭
歸委質昔鉅平貴將懸重于陸公叔向名流深
知于醜蔑吾雖不敏常慕前修不圖明庶有懷
翻其以此量物昔魏氏將亡羣凶挺爭諸賢戮
力想得其朋爲葛榮之黨邪爲邢杲之徒邪如
曰不然斯所未喻四也假使吾徒還爲凶黨侯
景生於趙代家自幽恒居則台司行爲連率山

川形勢、軍國彝章、不勞請箸、爲籌便當、屈指能
算、重以逋逃、小醜、羊豕、同羣、身寓江臯、家留河
朔、春春井井、如鬼如神、其不然乎、抑又君之所
知也、且夫宮闈秘事、竝若雲霄、英俊訐謨、甯非
帷幄、或陽驚以定策、或焚藁而奏書、朝廷之士
猶難參預、羈旅之人、何階耳目、至於禮樂、沿革
刑政、寬猛、則謳歌已遠、萬舞成風、不知手之舞
之、足之蹈之也、安在搖其牙齒、爲間諜者哉、若
謂復命西朝、終奔東虜、雖齊梁有隔、尉候奚殊、

豈以河曲之難浮而曰江關之可濟。河橋馬度。甯非宋典之姦。關路雞鳴。皆曰田文之客。何其通蔽。乃爾相妨。斯所未喻五也。又兵交使在。雖著前經。儻同狗僕之尤。追肆寒山之怒。則凡諸元帥。竝釋縲因。爰及偏裨。同無翦馘。乃至鍾儀見赦。朋笑遵途。襄老蒙歸。虞歌引路。吾等張旌。拭玉修好。尋盟涉泗之與。浮河郊勞。至於贈賄。公恩旣被。賓敬無違。今者何憊。翻蒙貶責。若以此爲言。斯所未喻六也。若曰祆氛永久。喪亂悠

然哀我奔波存其形魄固已銘茲厚德戴此洪
恩譬渤澥而俱深方嵩華而猶重但山梁飲啄
非有意于籠樊江海飛浮本無情于鐘鼓况吾
等營魂已謝餘息空留悲默爲生何能支久是
則雖蒙養護更天天年若以此爲言斯所未喻
七也若云逆豎殲夷當聽反命高軒繼路飛蓋
相隨未解其言何能善諧夫屯亨治亂豈有意
於前期謝常侍今年五十有一吾今年四十有
四介已知命賓又杖鄉計彼侯生肩隨而已豈

銀臺之要。彼未從師。金竈之方。吾知其訣。政恐南陽菊水。竟不延齡。東海桑田。無由佇望。若以此爲言。斯所未喻。八也。足下清襟勝託。書囿文林。凡自洪荒。終乎幽厲。如吾今日。甯有其人。爰至春秋。微宜商畧。夫宗姬殄隆。霸道昏凶。或執政之多門。或陪臣之涼德。故臧孫有禮翻。因與國之賓。周伯無憊。空怒天王之使。遷箕卿于兩館。繫驥子於三年。斯匪貪亂之風。邪甯當今之高例也。至於雙嶠。且帝四海爭雄。或構趙而侵。

燕或連韓而謀魏，身求盟於楚殿，躬奪璧于秦庭，輸寶鼎以託齊王。馳安車而誘梁客，其外膏脣販舌，分路揚鑣，無罪無辜，如兄如弟，逮乎中陽受命，天下同規，巡省諸華，無聞幽辱，及三方之霸也。孫甘言以斌媚，曹屈詐以羈縻，於軫歲到於句吳，冠蓋年馳於庸蜀，則客嘲殊險，賓戲已深。共盡遊談，誰云猜忤。若使搜求故實，脫有前蹤，恐是叔世之姦謀，而非爲邦之勝畧也。抑又聞之，雲師火帝，澆淳乃異其風，龍躍麟驚，王

霸雖殊其道莫不崇君親以詔物敵敬養以治
民預有邦司曾無隆替吾奉遠溫清仍屬亂離
寇虜猖狂公私播越蕭軒靡御王舫誰持瞻望
鄉關何心天地自非生憑廩竹源出空桑行路
含情猶其相愍常謂擇官而仕非曰孝家擇事
而趨非云忠國况乎欽承有道驂駕前王郎吏
明經鴟鳶知禮巡方省化咸問高年東序西膠
皆尊者耆耄吾以圭璋玉帛通聘來朝屬世道之
屯期鍾生民之否運兼年累載無申元直之所

銜泣吞聲。長對公間之怒情。禮之訴。將同逆鱗。忠孝之言。皆應齟舌。是所不圖也。非所仰望也。且天倫之愛。何得忘懷。妻子之情。誰能無累。夫以清河公主之貴。餘姚書佐之家。莫限高卑。皆被驅畧。自東南醜虜。抄販饑民。臺署卽官。俱餒墻壁。况吾生離死別。多歷暄寒。孀室嬰兒。何可言念。如得身還鄉土。躬自推求。猶冀提携。俱免凶虐。夫四聰不達。華陽君所謂亂臣。百姓無冤。孫叔敖稱爲良相。足下高才重譽。叅贊經綸。非

虎非貔聞詩聞禮而中朝大議曾未矜論清禁
嘉謀安能相及諤諤非周舍容容類胡廣何其
無諍臣哉歲月如流平生何幾晨看旅雁心赴
江淮昏望牽牛情馳揚越朝千悲而掩泣夜萬
緒而回腸不自知其爲生不自知其爲死也足
下素挺詞鋒兼長理窟匡丞相解頤之說樂令
君清耳之談向所諮疑誰能曉諭若鄙言爲謬
來旨必通分請灰釘甘從斧鑊何但規規默默
齟舌低頭而已哉若一理存焉猶希矜眷何必

期令我等必死齊都。足趙魏之黃塵。加幽并之
片骨。遂使東平拱樹。長懷向漢之悲。西洛孤墳。
恒表思鄉之夢。干祈以屢。哽慟增深。徐陵叩頭
再拜。

在北齊與宗室書

陵白臨淮負海。是謂徐州。顓頊高陽。世有明德。
自興王啓霸。無勞委劔之鋒。開國承家。實饗彤
弓之賜。其後金柯玉葉。霞振雲從。耆舊通人。茂
才多士。或以天下之貴。負石自沈。王命之尊。拂

衣高蹈。或熊衣雉製。青組朱旗。儒盛江東。文高
河北。或復分齊處魯。移魏居燕。瓜飈雖遙。芳枝
無遠。昔有王如王莽。無關控鵠之宗。劉曜劉淵。
彌非偃龍之族。又有朱家別錄。邾子之苗。何氏
殊源。韓侯之胤。三鳥五鹿。時事無恒。東郭西門。
遷訛非一。吾宗雖廣。未有駢枝。咸自駒王。同分
才子。正以金衡委御。玉斗宵亡。胡賊憑陵。中原
傾覆。我則供犧牲於東國。載主柘於南都。二百
餘年。家于揚越。此則盧謀不去。裴甯仍留。高宦

燕秦遲迴鄉壤。山河有隔。叙覲無緣。望冀馬而
增勞。瞻賓鴻而未歎。昔竇公累世。光武稱其外
家。許都遙遠。靈王思其舊宅。其言雖大。可以喻
小。况在宗親。甯無停眷。比月應雩龍。星移殷鳥
天。明和煦體中。何如願百年之老。典居多福。萬
石之君。寒暑清豫。其外族忠孝。比屋連薨。信義
勇於干戈。詩書甘於酒醴。或有漁獵三史。紛綸
五經。都講開覺。詩生負帙。邦君仁德。甯無掛榻
之思。州將欽風。應有題車之命。南陽坐嘯。寄以

共治東海行歌。資其主弼。梁竦不好。徒爲大言。
鄧禹平生。惟望如此。若棲遲偃仰。因事邱中。桃
果三名。粟園千樹。持竿而釣。徵聘不來。負耒而
耕。公侯靡屈。何其高也。蓋復休哉。如脫推延。或
遲竝問。吾階緣人乏。叨筮皇華。王事無淹。公禮
將畢。旣而揚都蕩覆。方離獫狁之災。越界風塵。
復蹈輪軒之禮。屏居空館。多厯歲時。釁犯靈祇。
招延禍罰。號慕無窮。肝膽屠殞。煩寃胸臆。不自
堪居。無心奈何。無狀奈何。自徘徊河朔。亟積寒

暄風患彌留。半體枯廢折。臂爲公。雖非羊祜。跋
足而使無慙。郤克固以形如槁木。心若死灰。匍
匐苦廬。纔有魂氣。夫迷山之客。遲遙響於巖崖。
窮海之賓。望孤煙於洲嶼。况乃宗均魯衛。地匪
燕吳。車騎相望。舟艫朝夕。三條不遠。五達非難。
信乃闊然。遂不蒙問。昔桃花之峽。長避秦嬴。芝
草之山。遙然滄海。猶復漁船可入。何況乎途不
兼旬月。勞懷旣積。輒命行人。弦望之間。遲枉歸
翰。儻二三兄弟。能敦昭穆之詩。求我漳濱。幸開

劉楨之疾。陽春改節。竝念將宜。扶力爲書。多不
詮次。陵白

在北齊與梁太尉王僧辯書

太清六年六月五日。孤子徐陵頓首。昔者雲師
火帝。非無戰陣之風。堯誓湯征。咸用干戈之道。
至於搖山蕩海。驅電乘雷。殲厥兇渠。無虧皇極。
若夏鍾夷羿。周厄犬戎。漢委珠囊。秦亡寶鏡。然
則皆聞之矣。未有膺龍圖以建國。御鳳邸以承
家。二后欽明。三靈交泰。而天崩地坼。妖寇橫行。

者也、自古銅頭鐵額、興暴皇年、檣杵窮奇、流災
中國、王彌石勒、吞噬關河、綠林青犢之羣、黑山
白馬之衆、校彼兵荒、無聞前史、八王故事、曾未
混淆、九州春秋、非云禍亂、我皇受命中興、光宅
天下、泰甯瑣瑣、安敢執鞭、建武栖栖、何期扶轂、
抑又聞之、陶唐旣作、天歸鳥喙之臣、豐畢將興、
特挺鷹揚之佐、明公量苞金鉉、神表玉璜、儷袞
欽才、平階仁德、固以留連管樂、惆悵風雲、濡足
維時、投竿斯在、去歲兇徒不騁、言次巴邱鼓聲

聞一柱之臺。烽火照三休之殿。公則懸麾羽扇。猶對投壺。戎羯咸奔。鯨鯢俱剪。樓船萬軸。還繫昆明。胡馬千羣。皆輸長樂。於是乎夏首西浮。雲行電邁。彭波東匯。谷靜山空。扼鵠尾而據王畿。登牛頭而掃天闕。漸臺僞帥。仍傳首於帝京。郿塢元兇。咸剗腸於軍市。青羗赤狄。同畀豺狼。胡服夷言。咸爲京觀。公園陵盡拜。忠貫長沙。神主咸安。勲踰高密。重以秦宮。旣獲魯殿。猶存闢綠。草於應門。開青槐於武庫。長安五陵之族。鄠杜

六遷之民。襁負而歸。都壘斯滿。鬻脂藏脯。遊騎
擊鐘。故市新城。飛薨華屋。東莞舊宅。人識桑榆。
南頓荒田。家分禾黍。豈以鄉名。穀熟。邑號禾興。
而已哉。若夫卦起龍文。書因鳥跡。劬勞王室。大
拯生民。自開闢以來。未之有也。雖十六才子。明
允篤誠。八百諸侯。專心同德。中宗佐命。俱畫丹
青。光武功臣。皆懸星象。棧道木閣。田單之奉。霸
齊。縮重將兵。周勃之扶彊。漢壤蟲之比黃鵠。轍
鮒之仰河宗。未足云也。孤子階緣。多幸叨筮。皇

華鄉國屯危，公私焦迫，邳彤之切，長亂心曾。徐
庶之祈，終無開允。既而屏居空館，多歷歲時。釁
犯幽祗，躬當勦滅。何圖釁咎，災極蒼旻。號慕煩
冤，肝腸屠殞。酷痛奈何，無狀奈何。惟桑與梓，翻
若天涯。杖柏栽松，悠然長絕。明明日月，號叫無
聞。茫茫宇宙，容身何所。窮劇奈何，自忝膺嘉聘。
仍屬亂離，上下年尊。偏嬰此酷，昔人迎門請盜。
恒懷廢寢之憂，當輓輿櫬。猶有危途之懼，况乎
逆寇崩騰。京師播越，興居動止。長隔山河，朝夕

館飽誰經心眼。程糜不繼。原粟何資。瞻望風雲。朝夕嗚咽。固乃遊魂已謝。非復全生。餘息空留。非爲全死。同冰魚之不絕。似蟄蟲之猶蘇。良可哀也。良可哀也。自東都紹漢。南亳興殷。修好徵兵。彌留星瑄。韓宣范武。方駕連鑣。蘇秦張儀。朱輪華轂。而孤子三危。是擯四罪。同科聽別。馬而長號。杖歸旌而末慟。王稽反命。旣無託乘之恩。椒舉相逢。誰爲班荆之位。昔人違齊處魯。時降徵求。亡晉奔秦。猶蒙招請。問管甯于遼左。追王

朗于浙東。竝物譽時賢。卿門公族。懸須應務。深
挾情祈。斯豈庸賤之儔耶。非餘生之敢望也。但
預在輜軒。誠爲過誤。珪璋特達。通聘河陽。貂珥
雍容。尋盟漳水。差有黃門啓封。非無青紙詔書。
羣將州司。郊迎負弩。鄉亭里候。飾館陳兵。豈是
復介而奔齊。甯當竊妻而逃晉。已焉哉。羌難得
其言也。漢之谷吉。捐軀者幾人。楚之申胥。埋魂
者何地。孤子何所歎焉。但頓伏苦廬。徒延光晷。
夫以啁噍鷲雀。躑躅鳴號。含識懷靈。未有其痛。

且夫曾耕雨雪。猶尚悲歌。蘇使幽囚。無馳哽噎。
公履忠弘孝。冠冕縉紳。化感煙雲。量標海岳。行
糜仲月。王政無塞。分穀高年。仁風斯遠。固以衣
纓仰訓。黎庶投懷。今日焦惶。彌布洪澤。雖復孤
骸不返。方爲漠北之塵。營魄知歸。終結江南之
草。孤子徐陵頓首。

與王吳郡僧智書

孤子徐陵頓首。昔林宗道主。時人多慕德之賓。
無忌雄豪。天下盡希風之客。况復王家沈默。謝

氏混玄、名貴公門、譽華卿子、而秦峰阻蔓、浙水
悠長、諮訴無因、但用窮結、比青蔓已戒、白露方
溥、體中何如、願聞康勝、鄧仲華服袞之年、荀令
則擁旄之日、徒云早達、未可同功、今日相方、豈
不高視、竊承富春、頃歲多難、薦臻、邑閉皆空、黔
黎將盡、御史舊榻、零落不存、太傅齊室、荒茫無
處、自神麾所屆、襁負斯歸、新屋方華、故田斯墾、
府吏閑坐、長使誦經、督郵無事、惟慮吹笛、東苞
海水、俱承幕府之威、西泊江沱、同仰惟良之化

政差邊張，何其神也。孤子無心，覩冒苟却，光陰
風疾，彌留示有餘息。恩將公聘，窮擯虜庭，博望
侯極跡於黃河。核中監流滯於滄海。自斯以後，
惟有庸賤，本應埋魂。趙魏析骨，幽并豈意。餘年
復反鄉國，仰屬伊公在亳。渭老師周，旌賁邱園。
採拾衡巷，遂以哀駘不棄。甕盎無遺，還顧庸虛。
未應偕此，竊承君侯過被，以光輝。屢有吹噓之
言，頻蒙薦延之澤，故得周行紫閣，升降丹墀。點
汗清朝，豈不荒愧。雖復華陰砥柱，帶地窮深。嵩

高維岳極天爲重。未可以方斯盛典。譬此洪恩。年迫桑榆。豈期酬報。政以川波非遠。對奉無因。夜夢子長之遊。朝覽希道之疏。浮雲西北。徒懷魏帝之文。行雨東南。思假飛山之便。窮誠已結。荒係逾深。方事祈寒。願加珍納。謹扶力白。書。迷乏不次。孤子徐陵頓首。

答李暉之書

近謬枉清音。無申窮眷。忽辱來告。文製兼美。君山西盛族。素挺風流。河北辭林。本所嗟賞。子桓

虛座甯不敬期。伯喈倒屣固以相屬。一日復其
草土。思襲衣裾披素清顏。但覺形穢。公輔之量
不負高名。王佐之才。信表天骨。孺子之榻。雖其
可懸。仲康之車。彌軫恒眷。孤子昔緣。素乏叨筮
皇華。今日形容。無關天壤。殘光炯炯。慮在昏明
餘息綿綿。待盡鐘漏。安可以樹揚名士。游處盛
賓。來喻泰高。如爲善謔。文艷質寡。何似上林華
而不實。將同桂樹。但忘年之款。昔有張裘鄰國
之交。非無嬰札。儻哀駘可悅。甕盎非疑。方願投

衿庶比傾蓋。頃陳湯之疾。歲月增深。羊祜之疴。秋冬彌劇。且年光逾盡。觸目崩心。扶力含毫。諸不申具。孤子徐陵頓首。

爲陳武帝作相時與北齊廣陵城主書

籍甚英風。常懷眷屬。封疆有限。寤寐增勞。辱此月九日。告深慰情。伋方秋尚熱。體中何如。戎帳艱辛。無乃爲弊。吾以庸薄。謬膺台鉉。旣荷先帝拔擢之恩。兼蒙今主責成之寄。政以皇齊大德。世紹和風。方藉威靈。庶乎讐耻。提携小國。願預

藩臣還詔哀矜許乖容納奉勅須質便遣入朝
部下諸將哀吾誠節一兒一弟無所遺恡立志
立義無負上天但故丞相諸子及湛海珍等竝
依勅旨馳遣渡江主上又遣吏部尚書王通鴻
臚卿謝岐等至和州與司馬行臺共爲盟誓而
蕭軌等決信叛亡苟相陵易鬱從東道馳至北
郊旣通宮闈無容靜默兩兩相對俱有損傷彼
間人馬因此奔散且置兵之地溝澗且多退兵
之時投赴相積近遣張都來此具是行人所見

但廣陵建業，纔隔一江，戰場去岸，不盈五里。軍人退散，理反家鄉。緣岸村人，復有舟楫。且蘆牌荻筏，竟浦浮江。千百爲群，前後相繼。吾又勒兵按甲，不聽討捕。若無恐懼，竝應安遠。假使在此，不可更生。至彼而殂，差非吾過。如其枉理，必是興軍。見伐於有道之人，加兵於無罪之國。若彼王師如此，又是違盟。后土皇天，山川社稷，察其怨語，甯容相祐。辱告承上黨殿，下及匹婁。領軍應來江右，師出無咎。此是何義小之事，大差無

違禮、彼之陵我、自是乖言、玄天所伐、匹馬無違、
翻見怨尤、一何非理、若彼鬼神有知、甯可斯背、
鬼神無知、何用盟歆、去歲柳達摩等石頭天井、
連月亢陽、三子纔降、連冬大雪、黃袍盡沒、白帳、
皆浮、旣因之以泥塗、兼加之以疾疫、蕭裴旣退、
雪霧便除、從爾以來、稍成災旱、定知衣冠之國、
禮樂相承、天道不言、不容都滅、長江渺渺、巨浪、
湯湯、如鬪艦舟師、詎有深利、近梁山之戰、卽是、
前車、蕪湖之役、可爲明鏡、昔晉侯不能乘鄭馬、

趙將不能用楚兵。一非水土。難爲騁力。揚州卑
濕。厥土塗泥。如遇秋霖。杳同江漢。假令蚩尤重
出。白起還生。控代馬而陵波。躡胡靴而湔水。終
難逞効。詎有成功。六州勇士。雖有百萬。十姓豪
傑。徒勞千億。不能爲患。斷可知矣。昔我平世。天
下乂安。人不識於干戈。時無聞於桴鼓。故得兇
人侯景。濟我橫江。天步中危。實由忘戰。自亂離
已久。人解用兵。女子無愧於韓彭。童兒不殊於
衛霍。吳鉤甚利。蜀甲殊輕。槩動風霜。弩穿金石。

高樓大艦，槩日凌雲，叱咤而起風雷，吹噓如倒
山嶽，侯車騎，國家重將，分陝上流，近隔以邊塵
時虧表疏，王途旣泰，貢賦相望，尋令子弟侍奉
京邑，蕭太保龍驤於賁海，王儀同虎視於洞庭
若望高峰，便當投袂，何則，凡諸將帥，各護家鄉
非直吾人，獨憂宗社，日者頻辱司馬行臺及諸
公有告，裴行臺當今方邵，此諸賢莫非英傑，其
餘軍士，悉是驍雄，庸蜀氏羌之兵，烏丸白虜之
騎，以此衆戰，誰能禦之，何爲比吾，倍薄相懸，何

惡諸君身名俱滅來告以細柳之軍踰於灞上
吾恐今之趙括不及廉頗也近張舍人至始奉
嚴勅朝廷遣劉叔經仍往啓聞願達丹誠用停
王赫伏計天慈理當懸照此身日月所鑒天地
所明豈敢虛言欺妄宸極足下既未知始末容
有疑恠大軍多士希惠矜弘量非此失時騰表
疏幸停師旅已存盟信庶其小國永申藩禮天
心無爽邇遐一同投筆悚慨不復多白

爲陳武帝作相時與嶺南酋豪書

夫否終斯泰，屯極則亨。若日月之迴環，猶陰陽之報復。近者數鍾九厄，王室中微。聖主欽明，還承寶運。卽是高祖武皇帝之孫，世祖元皇帝之子。重光累聖，胤國承家。天下生民，孰不歸德。賊勃不涯，疎戚希纂。帝圖信是，奸兇階茲。禍亂自王宮，再淪於醜逆。虜馬四飲於江沱，社稷阽危。鑿輿幽辱，勃身居列岳。自御疆兵，高視趨起。坐觀成敗，旣而天維重綴，國步還康。翻畫凶圖，更謀神鼎。且其兵馬之任，資於長昆。方牧之權，由

於承聖操兄戈而斬姪，藉國寵而弑君，不忠不義，莫斯爲甚。比春初，便遣大都督歐陽頔、城城主傅泰等兇徒數十，遂到臨川。吾奉承朝筭，指畫戎略，樊滕耿賈戮力爭驅，天地靈祇，水陸開道，獲傅泰不勞於一箭，擒歐陽無待於尺兵，僞黨皆俘，連城盡拔，所收軍資，不可稱算。去月十六日，德州刺史陳法武等願憤迴戈，仍梟兇豎，一夫挺劍，傳首上京，萬里澄清，人神慶躍。彼豪門著姓，典牧方州，拘隔天朝，亟離寒暑，公私憤

歎豈可爲懷、今王道平夷、理增懼怵、朱明戒節、
比復何如、軍士平安、境內清謐、吾以庸薄、叨秉
國鈞、恒務牽纏、諸有勞弊、自天數云否、朝禍薦
臻、東夏崩騰、西京蕩覆、身惟許國、任在勤王、宣
力皇家、靡有甯歲、一還京師、保持鴻業、四驅夷
狄、奪得江左、始則杜龕元惡、張彪不恭、據有秦
稽、連蹤巨震、隨機討掩、觸刃平夷、叛臣任約、徐
嗣徽等、屢引齊虜、前年未旣、踐京師、江畔邊城、
皆爲戎戍、賴貔貅、騁力衛霍、同心殲厥胡夷、不

日清殄，去年將夏，傾國大來，鐵騎八千許匹，巾
士二十餘萬，胡塵飛於北闕，虜鼓震於南宮，躬
率偏裨，聊與挑戰，虜便土崩瓦解，投險赴坑，大
小皆擒，鯨鯢盡戮，三江之上，塞水無流，千里之
間，伏屍相枕，生獲大都督蕭軌、裴英，起東方老
李希光、王敬寶等，虜中驍將，惟此數人，屢破關
西之兵，頻取淮右之地，一朝俘斬，無復子遺，遠
邇歡欣，華夷怖懼，如聞彼虜，稍是危亡，尋命熊
羆，欲就征討，方可以雷行趙魏，電掃幽并，混一

車書勢在朝暮而侯璵跋扈江川公私阻絕卽
平北賊仍事南征肉袒面縛歸首闕庭卽爲申
聞優其禮秩臺儀不貶位遇兼常今所擒歐陽
頽傅泰等莫不弘宥政爾授其兵馬處以榮祿
坦然游狎無介懷抱年號武平國卽清晏君之
聞此甯不欣躍但昔緣王事游踐貴鄉日想山
川依然舊識吾旣忝荷朝私位逾台袞身持帝
王之柄手握天下之圖故鄉如此誠爲衣繡故
人不見還同宵錦天涯藐藐地角悠悠言面無

由、但、以、情、企、今、者、王、猷、帝、載、化、被、無、垠、浮、海、窮、
山、罔、不、咸、格、投、竿、負、鼎、馳、步、蒼、龍、崖、穴、丘、園、爭、
趨、金、馬、君、之、才、具、信、美、登、朝、如、戀、本、鄉、不、能、游、
宦、門、中、子、弟、望、遣、來、儀、當、爲、申、聞、各、處、榮、祿、深、
加、將、保、念、嗣、音、郵、今、遣、某、甲、等、使、彼、指、此、不、多、
爲、陳、武、帝、與、周、宰、相、書

昔、有、天、地、便、立、帝、王、革、昊、惟、農、遷、虞、斯、夏、莫、不、
三、靈、所、祐、五、運、相、推、梁、德、不、造、固、天、攸、棄、雖、復、
東、漢、之、禾、區、宇、沸、騰、西、晉、之、亡、生、民、蕩、覆、未、足、

以方其禍亂。譬彼虔劉者也。吾謬以庸薄屬當
興運。自昔登庸。清諸百越。徐聞浪泊。靡不征行。
銀洞珠宮。所在清乂。自還麾南極。代逾東都。宣
力驅馳。亟淹寒暑。六延梁社。十剪彊寇。黃帝與
蚩尤七十戰。魏祖在軍中三十年。方厥勛勞。未
爲勤苦。加以百神所感。明靈應期。萬里徂征。虬
龍表瑞。於是中軍勇銳。上將橫行。承此休符。遂
興王業。梁氏以天祿斯改。期運永終。欽若唐風。
推其鼎命。吾驚惶三讓。拜手陳辭。盈廷公卿。稽

穎敦、偪眷、言穎、水徒、抱素、心尚、想汾、陽無、因高、蹈猥、以庸、薄遂、膺天、寵去、月乙、亥昇、禮大、壇言、念遷、徊但有、慙愧、昔賓、門之、始境、外無、交雖、遣行人、未申、嘉好、今上、天有、命光、膺寶、厯永、興周室、方同、斷金、我運、惟新、宜脩、朝聘、今遣、侍中都官、尚書、周弘、正銜、使長、安故、指有、白。

爲陳主與周冢宰宇文護論邊境事書

國有三慶。民有四安。所謂通和。是由鄰睦。况周陳款好一紀于茲。懷抱相期。百世方遠。灌瓜之

美。久勅邊吏。拾橡之尤。想應無忽。梁氏以漸。水
東爲安湘小郡。宜立巴州。多歷年所。此於荆部。
本包分界。近得刺史符元舉。啓稱蕭歸忽遣杜
元茂神僧訓等將率人馬。踰潰涉漸。便置城隍。
謀爲侵軼。適荷隣德。合州見還。不容今眷。仍縱
蕭氏元舉累移論及翻相河漢。更往研問。便騁
鋒鏑。彼軍人恃勇。遂致俘擒。聞此紛紜。甚以驚
歎。其商奄餘孽。才力甚微。爲暴邊城。良憑大國。
但情均忌器。不可加兵。便勅軍司。以禮相放。且

前歲所立疆城、本以南平等五郡輸薦貴朝、至如安湘、旣屬巴郡、幸承鄰惠、無候涉言、故下漸東、惟如澧北、政是標其大桶、屬荊州之界耳、彼此方申分好、義絕規圖、所貴惟和、所重惟信、夫以南平等郡地曠民豐、雲夢之田、楚王爲寶、吳當勁蜀、晉拒疆秦、資彼山川、茲爲州鎮、朕若棄其仁義、務廣封域、甯容延歲、茲貢周朝、今者和親已固、山岳而方、謀尺寸之土、用益蒹葭之地、哉幸非竊疾、相見鑒容、江陵小寇、旣爾虔劉、前

至之言、或相誣罔、一二因使人宇文平口具其
懷耿耿、故此相白、

爲陳主答周主論和親書

使人使持節車騎大將軍儀同三司大都督治
司城使主杜子暉中軍山遂伯使副鮑宏等至
省告具懷、夫聖君明辟、司御兆民、則天象地、位
育黔首、故張旛以往、拭玉而來、同在蒼生、恢宏
文武、雖毀戈鑄戟、未擬上皇、散馬休牛、載懷偃
伯、非期與睦、忽爽和風、奚用殲師、信由天討、追

尋曩好歎想兼懷言觀今書甫承家難知以冢
宰執政擅同淵藪令尹當朝妄專征伐無君之
謫俾墜其師無將之誅已從司寇刑名旣肅國
步還康希篤親隣敬開衷欵若二境交歡俱饗
多福八荒期乂良副所懷今遣具位某甲等使
不復多述、

在吏部尚書答諸求官人書

自古有吏部尚書者品藻人倫簡其才能尋其
門胄逐其少多量其官爵但古來數千年非無

明時也。非無明主也。自有才用。雖美階級不通。門戶雖高。官資殊屈。若斯人者。其例甚多。請問諸君。此是何義。夫一千錢一斛米之多少。猶關相祿。况復皇朝官爵。理係立天內典。謂之爲業。外書稱之爲命。五行有驛馬之言。六甲有官鬼之說。必令驛馬時發。官鬼尅身。所望階榮。便當果遂。如其不爾。決是難諧。豈可改尚書作官鬼。驅老僕爲驛馬耶。若見問尚書。何不分判。用與不用。許與不許。僕答云。君非屈滯。豈可相期決。

言應果，若今驛馬差爽，便是乖信，此關君命，僕何以相答耶？若朝散之流，行止之屬，門戶相似，人才不殊，選家斟酌，無能爲爾。若陟大位，清官悉由玄命，夫人君賓用，竝是前緣。故宋文帝云：人豈無運命，每有好官缺，輒憶羊玄保。梁武帝云：世間人言有目色，我特不目色。范攄自此而論，豈非前業？且世諺云：圖官在亂世，覓富在荒年。梁孝元帝承侯景之凶荒，王太尉接荊州之禍敗，爾時喪亂，無復典章，故使官方窮此紛雜。

自紹泰太平及求定中聖朝草創爾時州州自
帝郡郡稱王天下干戈尚無條序兼以府庫空
虛賞賜懸乏白銀之寶難得黃紙之板易營假
以官榮代於錢絹義在撫綏無計多少又有非
舊非勲非地非才託節將而求官因時人以買
位賣官既賤皆爲清顯故員外常侍路上比肩
諮議叅軍市中無數四軍五校車載斗量豈是
朝章應其如此今衣冠禮樂日富年華主上體
成王之風太傅弘周公之德西羌北狄畏我王

威時旣清矣。時旣平矣。何可猶作亂世意。而覓
非分之官耶。凡人所以稱屈滯者。身已不無寸
能。官又不及父祖。旣是明時。可以於邑。所見諸
君。多踰本分。猶言太屈。未踰高懷。若問梁朝朱
領軍等。竝爲卿相。此不踰其本分耶。此天子所
用。非關選序舊章。秦有車府令。趙高直爲丞相。
漢有高廟令。田千秋亦爲丞相。此復可爲例耶。
僕七十之歲。朝思夕計。竝願與諸賢爲真善知
識。曾無嫌隙。差可周旋。非欲令君作此怨訴。但

既忝衡流，應須粉墨。庶其允當，無負朝寄耳。去年疾患，亦餘氣息，不能相答。通作此書，所望諸賢深明鄙意。徐君白。

同前

此篇陳書本

自古吏部尚書者，品藻人倫，簡其才能，尋其門胄，遂其大小，量其官爵。梁元帝承侯景之凶，元王太尉接荊州之禍，敗爾時喪亂，無復典章。故使官方窮，此紛襍未定之時。聖朝草創，干戈未息，亦無條序。府庫空虛，賞賜慙乏，白銀難得，黃

札易營權以官階代於錢絹義存撫接無計多
少致令員外常侍路上比肩諮議叅軍市中無
數豈是朝章應其如此今衣冠禮樂日富年華
何可猶作舊意非理望也所見諸君多踰本分
猶言大屈未喻高懷若問梁朝朱領軍昇亦爲
卿相此不踰其本分邪此是天子所拔非關選
序梁武帝云世間人言有目色我特不目色范
攄宋文帝亦云人世豈無運命每有好官缺輒
憶羊玄保此則清階顯職不由選也秦有車府

令趙高。直至丞相。漢有高廟。令田千秋亦爲丞相。此復可爲例耶。旣忝衡流。應須粉墨。所望諸賢。深明鄙意。

答周處士書

辱去年三月二十七日告仰。披華翰甚慰。翹結承歸來天目。得肆閑居。差有弄玉之俱仙。非無孟光之同隱。優游俯仰。極素女之經文。升降盈虛。盡軒皇之圖藝。雖復考槃在阿。不爲獨宿。詎勞金液。唯飲玉泉。比夫煮石紛紜。終年不爛。燒

丹辛苦。至老方成。及其得道。冥真何勞逸之相懸也。又承有方生亦在天目。理當仰稟明師。總斯秘要。豈如張陵弟子。自墜高巖。孫泰門人。競投滄海。何其樂乎。聖朝虚心版築。尚想邱園。若彼能赴嘉招。便當謹申高命。但其人往歲亦望至京師。觀此風神。確乎難拔。故以忘懷爵祿。詎持犧牲之談。高視公卿。獨騁蜡蠅之訓。所恐有道三辟。公車十徵。若斯者。終當不屈。此旣然矣。請復詳言昔楚國兩龔。同時紆組。漢陰二老。相

攜抱甕。兄之幽貞。若其鑿坯負石。方同形影。結
綬彈冠。無容越楚。况乎糞土夔龍。羶臊名器。已
所不欲。非應及人。忽承來音。良以多感。何則。上
陽巢父。不會令薦許由。商洛園公。未聞求徵綺
季。斯所未喻。高懷而躊躇於矛楯也。唯遲山阿
近信。更惠芳音。如或誠言。謹便聞奏。第夙勞比
劇。不復多呈。徐君白

與章司空昭達書

君白日聖朝受命。天下廓清。所餘殘兇。惟有歐

紇南通交管北據衡疑兄弟叔侄盤阻川洞百
越之費不供王府萬里之民不由國家明公受
賑嚴冬持兵杪歲開冰踐露滿火宵行便屈全
淮乃其神速未騁三略非勞六奇薄交旗鼓仍
平醜類自太清之未永定以來所關疆界不過
郡邑今茲赴捷二十餘州若較此功庸方茲英
力漢之馬援不能爲擬吳之步騭故是相懸况
孫處宗之叛徒正槌盪主耳公私慶快豈可而
言且僕一子屯窮妖徒所制五嶺遐覓存亡不

測懸懷飲淚破膽復全蒙荷英恩保其身命餘
年仰戴何力能勝今遣主師某馳往稱慶徐君
呈

重答朝臣書

老病屬纊不能多說古人爭議多成怨府傳立
見尤於晉代王商取陷於漢朝謹自三緘敬同
高命若萬一不死猶得展言庶與群賢更申揚
擢